

Quzāt

Junūbī Kanān par Mukammal Qābū Nahīn Pāyā Jātā

¹ Yashua kī maut ke bād Isrāīliyoñ ne Rab se pūchhā, “Kaun-sā qabīlā pahle nikal kar Kanāniyoñ par hamlā kare?”

² Rab ne jawāb diyā, “Yahūdāh kā qabīlā shurū kare. Maiñ ne mulk ko un ke qabze meñ kar diyā hai.”

³ Tab Yahūdāh ke qabīle ne apne bhāiyoñ Shamāūn ke qabīle se kahā, “Āeñ, hamāre sāth nikleñ tāki ham mil kar Kanāniyoñ ko us ilāqe se nikāl deñ jo qurā ne Yahūdāh ke qabīle ke lie muqarrar kiyā hai. Is ke badle ham bād meñ āp kī madad kareñge jab āp apne ilāqe par qabzā karne ke lie nikleñge.” Chunānche Shamāūn ke mard Yahūdāh ke sāth nikle.

⁴ Jab Yahūdāh ne dushman par hamlā kiyā to Rab ne Kanāniyoñ aur Farizzioñ ko us ke qābū meñ kar diyā. Bazaq ke pās unhoñ ne unheñ shikast dī, go un ke kul 10,000 ādmī the.

⁵ Wahāñ un kā muqābalā ek bādshāh se huā jis kā nām Adūnī-bazaq thā. Jab us ne dekhā ki Kanānī aur Farizzī hār gae haiñ

⁶ to wuh farār huā. Lekin Isrāīliyoñ ne us kā tāqqub karke use pakar liyā aur us ke hāthoñ aur paioñ ke angūṭhoñ ko kāt liyā.

⁷ Tab Adūnī-bazaq ne kahā, “Maiñ ne khud sattar bādshāhoñ ke hāthoñ aur paioñ ke angūṭhoñ ko kaṭwāyā, aur unheñ merī mez ke

nīche gire hue khāne ke raddī ṭukre jamā karne paṛe. Ab Allāh mujhe is kā badlā de rahā hai.” Use Yarūshalam lāyā gayā jahān wuh mar gayā.

⁸ Yahūdāh ke mardoñ ne Yarūshalam par bhī hamlā kiyā. Us par fatah pā kar unhoñ ne us ke bāshindoñ ko talwār se mār ḍālā aur shahr ko jalā diyā.

⁹ Is ke bād wuh āge baṛh kar un Kanāniyoñ se laṛne lage jo pahārī ilāqe, Dasht-e-Najab aur maḡhrib ke nashebī pahārī ilāqe meñ rahte the.

¹⁰ Unhoñ ne Habrūn Shahr par hamlā kiyā jo pahle Qiriyat-arbā kahlātā thā. Wahān unhoñ ne Sīsī, Akhīmān aur Talmī kī faujoñ ko shikast dī.

¹¹ Phir wuh āge Dabīr ke bāshindoñ se laṛne chale gae. Dabīr kā purānā nām Qiriyat-sifar thā.

¹² Kālib ne kahā, “Jo Qiriyat-sifar par fatah pā kar qabzā karegā us ke sāth maiñ apnī beṭī Aksā kā rishtā bāndhūngā.”

¹³ Kālib ke chhoṭe bhāī Ġhutniyel bin Qanaz ne shahr par qabzā kar liyā. Chunānche Kālib ne us ke sāth apnī beṭī Aksā kī shādī kar dī.

¹⁴ Jab Aksā Ġhutniyel ke hāñ jā rahī thī to us ne use ubhārā ki wuh Kālib se koī khet pāne kī darkhāst kare. Achānak wuh gadhe se utar gai. Kālib ne pūchhā, “Kyā bāt hai?”

¹⁵ Aksā ne jawāb diyā, “Jahez ke lie mujhe ek chīz se nawāzeñ. Āp ne mujhe Dasht-e-Najab meñ zamīn de dī hai. Ab mujhe chashme bhī de dījie.” Chunānche Kālib ne use apnī milkiyat meñ se ūpar aur nīche wāle chashme bhī de die.

¹⁶ Jab Yahūdāh kā qabilā Khajūroñ ke Shahr se

rawānā huā thā to Qīnī bhī un ke sāth Yahūdāh ke registān meñ āe the. (Qīnī Mūsā ke susar Yitro kī aulād the.) Wahāñ wuh Dasht-e-Najab meñ Arād Shahr ke qarīb dūsre logoñ ke darmiyān hī ābād hue.

¹⁷ Yahūdāh kā qabilā apne bhāiyōñ Shamāūn ke qabile ke sāth āge baṛhā. Unhoñ ne Kanānī shahr Safat par hamlā kiyā aur use Allāh ke lie maḥsūs karke mukammal taur par tabāh kar diyā. Is lie us kā nām Hurmā yānī Allāh ke Lie Tabāhī paṛā.

¹⁸ Phir Yahūdāh ke faujiyōñ ne Ghazzā, Askqalūn aur Aqrūn ke shahroñ par un ke gird-o-nawāh kī ābādiyōñ samet fatah pāī.

¹⁹ Rab un ke sāth thā, is lie wuh pahāṛī ilāqe par qabzā kar sake. Lekin wuh samundar ke sāth ke maidānī ilāqe meñ ābād logoñ ko nikāl na sake. Wajah yih thī ki in logoñ ke pās lohe ke rath the.

²⁰ Mūsā ke wāde ke mutābiq Kālib ko Habrūn Shahr mil gayā. Us ne us meñ se Anāq ke tīn beṭoñ ko un ke gharānoñ samet nikāl diyā.

²¹ Lekin Binyamīn kā qabilā Yarūshalam ke rahne wāle Yabūsiyōñ ko nikāl na sakā. Āj tak Yabūsi wahāñ Binyamīniyōñ ke sāth ābād haiñ.

Shimālī Kanān par Mukammal Qābū Nahīñ Pāyā Jātā

²²⁻²³ Ifrāīm aur Manassī ke qabile Baitel par qabzā karne ke lie nikle. (Baitel kā purānā nām Lūz thā.) Jab unhoñ ne apne jāsūsoñ ko shahr kī taftīsh karne ke lie bhejā to Rab un ke sāth thā.

24 Un ke jāsūsoñ kī mulāqāt ek ādmī se huī jo shahr se nikal rahā thā. Unhoñ ne us se kahā, “Hameñ shahr meñ dākhil hone kā rāstā dikhāeñ to ham āp par rahm kareñge.”

25 Us ne unheñ andar jāne kā rāstā dikhāyā, aur unhoñ ne us meñ ghus kar tamām bāshindoñ ko talwār se mār ḍālā siwāe mazkūrā ādmī aur us ke ḳhāndān ke.

26 Bād meñ wuh Hittiyon ke mulk meñ gayā jahāñ us ne ek shahr tāmīr karke us kā nām Lūz rakhā. Yih nām āj tak rāyj hai.

27 Lekin Manassī ne har shahr ke bāshinde na nikāle. Bait-shān, Tānak, Dor, Ibliyām, Majiddo aur un ke gird-o-nawāh kī ābādiyān rah gaīn. Kanānī pūre azm ke sāth un meñ ṭike rahe.

28 Bād meñ jab Isrāīl kī tāqat barh gaī to in Kanāniyon ko begār meñ kām karnā paṛā. Lekin Isrāīliyon ne us waqt bhī unheñ mulk se na nikālā.

29 Isī tarah Ifrāīm ke qabīle ne bhī Jazar ke bāshindoñ ko na nikālā, aur yih Kanānī un ke darmiyān ābād rahe.

30 Zabūlūn ke qabīle ne bhī Qitron aur Nahlāl ke bāshindoñ ko na nikālā balki yih un ke darmiyān ābād rahe, albattā unheñ begār meñ kām karnā paṛā.

31 Āshar ke qabīle ne na akkū ke bāshindoñ ko nikālā, na Saidā, Ahlāb, Akzīb, Hilbā, Afīq yā Rahob ke bāshindoñ ko.

32 Is wajah se Āshar ke log Kanānī bāshindoñ ke darmiyān rahne lage.

33 Naftālī ke qabīle ne Bait-shams aur Bait-anāt ke bāshindoñ ko na nikālā balki wuh bhī

Kanāniyoñ ke darmiyān rahne lage. Lekin Bait-shams aur Bait-anāt ke bāshindoñ ko begār meñ kām karnā paṛā.

³⁴ Dān ke qabīle ne maidānī ilāqe par qabzā karne kī koshish to kī, lekin Amoriyoñ ne unheñ āne na diyā balki pahārī ilāqe tak mahdūd rakhā.

³⁵ Amorī pūre azm ke sāth Haris Pahār, Aiyālon aur Sālbīm meñ ṭike rahe. Lekin jab Ifrāīm aur Manassī kī tāqat baṛh gaī to Amoriyoñ ko begār meñ kām karnā paṛā.

³⁶ Amoriyoñ kī sarhad Darrā-e-Aqrabbīm se le kar Silā se pare tak thī.

2

Rab kā Farishtā Isrāīl ko Malāmat Kartā Hai

¹ Rab kā farishtā Jiljāl se chaṛh kar bokīm pahuñchā. Wahāñ us ne Isrāīliyoñ se kahā, “Maiñ tumheñ Misr se nikāl kar us mulk meñ lāyā jis kā wādā maiñ ne qasam khā kar tumhāre bāpdādā se kiyā thā. Us waqt maiñ ne kahā ki maiñ tumhāre sāth apnā ahd kabhī nahīn torūngā.

² Aur maiñ ne hukm diyā, ‘Is mulk kī qaumōñ ke sāth ahd mat bāndhnā balki un kī qurbāngāhoñ ko girā denā.’ Lekin tum ne merī na sunī. Yih tum ne kyā kiyā?

³ Is lie ab maiñ tumheñ batātā hūñ ki maiñ unheñ tumhāre āge se nahīn nikālūngā. Wuh tumhāre pahluoñ meñ kāñṭe baneṅge, aur un ke dewatā tumhāre lie phandā bane raheṅge.”

⁴ Rab ke farishte kī yih bāt sun kar Isrāīlī khūb roe.

⁵ Yihī wajah hai ki us jagah kā nām bokīm yānī Rone Wāle par gayā. Phir unhoñ ne wahāñ Rab ke huzūr qurbāniyāñ pesh kīñ.

Isrāīl Bewafā Ho Jātā Hai

⁶ Yashua ke qaum ko ruḡhsat karne ke bād har ek qabīlā apne ilāqe par qabzā karne ke lie rawānā huā thā.

⁷ Jab tak Yashua aur wuh buzurg zindā rahe jinhoñ ne wuh azīm kām dekhe hue the jo Rab ne Isrāīliyoñ ke lie kie the us waqt tak Isrāīlī Rab kī wafādārī se ḡhidmat karte rahe.

⁸ Phir Rab kā ḡhādīm Yashua bin Nūn intaqāl kar gayā. Us kī umr 110 sāl thī.

⁹ Use Timnat-haris meñ us kī apnī maurūsī zamīn meñ dafnāyā gayā. (Yih shahr Ifrāīm ke pahārī ilāqe meñ jās pahār ke shimāl meñ hai.)

¹⁰ Jab hamasar Isrāīlī sab mar kar apne bāpdādā se jā mile to nāi nasl ubhar āī jo nā to Rab ko jāntī, na un kāmōñ se wāqif thī jo Rab ne Isrāīl ke lie kie the.

¹¹ Us waqt wuh aisī harkateñ karne lage jo Rab ko burī lagīñ. Unhoñ ne Bāl Dewatā ke butōñ kī pūjā karke

¹² Rab apne bāpdādā ke ḡhudā ko tark kar diyā jo unheñ Misr se nikāl lāyā thā. Wuh gird-onawāh kī qaumoñ ke dīgar mābūdoñ ke pīchhe lag gae aur un kī pūjā bhī karne lage. Is se Rab kā ḡhazab un par bhāḡkā,

¹³ kyonki unhoñ ne us kī ḡhidmat chhoḡ kar Bāl Dewatā aur Astārāt Dewī kī pūjā kī.

¹⁴ Rab yih dekh kar Isrāīliyoñ se nārāz huā aur unheñ ḡākuoñ ke hawāle kar diyā jinhoñ ne un

kā mā lūtā. Us ne unheñ irdgird ke dushmanoñ ke hāth bech ḍālā, aur wuh un kā muqābalā karne ke qābil na rahe.

¹⁵ Jab bhī Isrāīlī laṛne ke lie nikle to Rab kā hāth un ke ḵhilāf thā. Natījatan wuh hārte gae jis tarah us ne qasam khā kar farmāyā thā.

Jab wuh is tarah baṛī musībat meñ the

¹⁶ to Rab un ke darmiyān qāzī barpā kartā jo unheñ lūtne wāloñ ke hāth se bachāte.

¹⁷ Lekin wuh un kī na sunte balki zinā karke dīgar mābūdoñ ke pīchhe lage aur un kī pūjā karte rahte. Go un ke bāpdādā Rab ke ahkām ke tābe rahe the, lekin wuh ḵhud baṛī jaldī se us rāh se haṭ jāte jis par un ke bāpdādā chale the.

¹⁸ Lekin jab bhī wuh dushman ke zulm aur dabāw tale karāhne lagte to Rab ko un par tars ā jātā, aur wuh kisī qāzī ko barpā kartā aur us kī madad karke unheñ bachātā.

Jitne arse tak qāzī zindā rahtā utnī der tak Isrāīlī dushmanoñ ke hāth se mahfūz rahte.

¹⁹ Lekin us ke marne par wuh dubārā apnī purānī rāhoñ par chalne lagte, balki jab wuh muṛ kar dīgar mābūdoñ kī pairawī aur pūjā karne lagte to un kī rawish bāpdādā kī rawish se bhī burī hotī. Wuh apnī sharīr harkatoñ aur haṭdharm rāhoñ se bāz āne ke lie taiyār hī na hote.

²⁰ Is lie Allāh ko Isrāīl par baṛā ḡhussā āyā. Us ne kahā, “Is qaum ne wuh ahd toṛ diyā hai jo maiñ ne is ke bāpdādā se bāndhā thā. Yih merī nahīñ suntī,

²¹ is lie maiñ un qaumoñ ko nahīñ nikālūngā jo Yashua kī maut se le kar āj tak mulk meñ rah

gaī haiñ. Yih qaumeñ is meñ ābād raheñgī,

²² aur maiñ un se Isrāīliyoñ ko āzmā kar dekhūngā ki āyā wuh apne bāpdādā kī tarah Rab kī rāh par chaleñge yā nahīñ.”

²³ Chunāñche Rab ne in qaumoñ ko na Yashua ke hawāle kiyā, na fauran nikālā balki unheñ mulk meñ hī rahne diyā.

3

Allāh Isrāīl ko Kanānī Qaumoñ se Āzmātā Hai

¹ Rab ne kāī ek qaumoñ ko Mulk-e-Kanān meñ rahne diyā tāki un tamām Isrāīliyoñ ko āzmāe jo khud Kanān kī jangoñ meñ sharik nahīñ hue the.

² Nīz, wuh naī nasl ko jang karnā sikhānā chāhtā thā, kyoñki wuh jang karne se nāwāqif thī. Zail kī qaumeñ Kanān meñ rah gaī thīñ:

³ Filistī un ke pāñch hukmrānoñ samet, tamām Kanānī, Saidānī aur Lubnān ke pahārī ilāqe meñ rahne wāle Hiwwī jo Bāl-harmūn Pahār se le kar Labo-hamāt tak ābād the.

⁴ Un se Rab Isrāīliyoñ ko āzmānā chāhtā thā. Wuh dekhnā chāhtā thā ki kyā yih mere un ahkām par amal karte haiñ yā nahīñ jo maiñ ne Mūsā kī mārifat un ke bāpdādā ko die the.

Ġhutniyel Qāzī

⁵ Chunāñche Isrāīlī Kanāniyoñ, Hittiyōñ, Amoriyoñ, Farizziyōñ, Hiwwiyōñ aur Yabūsiyoñ ke darmiyān hī ābād ho gae.

⁶ Na sirf yih balki wuh in qaumoñ se apne beṭe-beṭiyōñ kā rishtā bāndh kar un ke dewatāoñ kī pūjā bhī karne lage.

⁷ Isrāīliyon̄ ne aisī harkateñ kīñ jo Rab kī nazar meñ burī thīñ. Rab ko bhūl kar unhoñ ne Bāl Dewatā aur Yasīrat Dewī kī k̄hidmat kī.

⁸ Tab Rab kā ghazab un par nāzil huā, aur us ne unheñ Masopotāmiyā ke bādshāh Kūshan-ris'ataim ke hawāle kar diyā. Isrāīlī āth sāl tak Kūshan ke ghulām rahe.

⁹ Lekin jab unhoñ ne madad ke lie Rab ko pukārā to us ne un ke lie ek najātdahindā barpā kiyā. Kālib ke chhoṭe bhāī Ghutniyel bin Qanaz ne unheñ dushman ke hāth se bachāyā.

¹⁰ Us waqt Ghutniyel par Rab kā Rūh nāzil huā, aur wuh Isrāīl kā qāzī ban gayā. Jab wuh jang karne ke lie niklā to Rab ne Masopotāmiyā ke bādshāh Kūshan-ris'ataim ko us ke hawāle kar diyā, aur wuh us par ghālib ā gayā.

¹¹ Tab mulk meñ chālīs sāl tak amn-o-amān qāym rahā. Lekin jab Ghutniyel bin Qanaz faut huā

¹² to Isrāīlī dubārā wuh kuchh karne lage jo Rab kī nazar meñ burā thā. Is lie us ne Moāb ke bādshāh Ijlūn ko Isrāīl par ghālib āne diyā.

¹³ Ijlūn ne Ammoniyon̄ aur Amālīqiyoñ ke sāth mil kar Isrāīliyon̄ se jang kī aur unheñ shikast dī. Us ne Khajūron̄ ke Shahr par qabzā kiyā,

¹⁴ aur Isrāīl 18 sāl tak us kī ghulāmī meñ rahā.

Ahūd Qāzī kī Chālākī

¹⁵ Isrāīliyon̄ ne dubārā madad ke lie Rab ko pukārā, aur dubārā us ne unheñ najātdahindā atā kiyā yāñī Binyamīn ke qabīle kā Ahūd bin Jirā jo bāeñ hāth se kām karne kā ādī thā. Isī shakhs ko Isrāīliyon̄ ne Ijlūn Bādshāh ke pās bhej diyā tāki wuh use kharāj ke paise adā kare.

16 Ahūd ne apne lie ek dodhārī talwār banā lī jo taqrīban ḍeṛh fuṭ lambī thī. Jāte waqt us ne use apnī kamr ke dāīn taraf bāndh kar apne libās meñ chhupā liyā.

17 Jab wuh Ijlūn ke darbār meñ pahuñch gayā to us ne Moāb ke bādshāh ko ḳharāj pesh kiyā. Ijlūn bahut moṭā ādmī thā.

18 Phir Ahūd ne un ādmiyoñ ko ruḳhsat kar diyā jinhoñ ne us ke sāth ḳharāj uṭhā kar use darbār tak pahuñchāyā thā.

19-20 Ahūd bhī wahān se rawānā huā, lekin Jiljāl ke butoñ ke qarīb wuh muṛ kar Ijlūn ke pās wāpas gayā.

Ijlūn bālāḳhāne meñ baiṭhā thā jo zyādā ṭhandā thā aur us ke zātī istemāl ke lie maḳhsūs thā. Ahūd ne andar jā kar bādshāh se kahā, “Merī āp ke lie ḳhufiyā ḳhabar hai.” Bādshāh ne kahā, “Ḳhāmosh!” Bāqī tamām hāzirīn kamre se chale gae to Ahūd ne kahā, “Jo ḳhabar mere pās āp ke lie hai wuh Allāh kī taraf se hai!” Yih sun kar Ijlūn khaṛā hone lagā,

21 lekin Ahūd ne usī lamhe apne bāeñ hāth se kamr ke dāīn taraf bandhī huī talwār ko pakaṛ kar use miyān se nikālā aur Ijlūn ke peṭ meñ dhañsā diyā.

22 Talwār itnī dhañs gai ki us kā dastā bhī charbī meñ ḡhāyb ho gayā aur us kī nok ṭāngoñ meñ se niklī. Talwār ko us meñ chhoṛ kar

23 Ahūd ne kamre ke darwāzoñ ko band karke kundī lagāi aur sāth wāle kamre meñ se nikal kar chalā gayā.

24 Thoṛī der ke bād bādshāh ke naukaroñ ne ā kar dekhā ki darwāzoñ par kundī lagī hai.

Unhoñ ne ek dūsre se kahā, “Wuh hājat rafā kar rahe hoñge,”

²⁵ is lie kuchh der ke lie ṭhahre. Lekin darwāzā na khulā. Intazār karte karte wuh thak gae. Lekin besūd, bādshāh ne darwāzā na kholā. Āḡhirkār unhoñ ne chābī ḡhūḡ kar darwāzoñ ko khol diyā aur dekhā ki mālik kī lāsh farsh par paṛī huī hai.

²⁶ Naukaroñ ke jhijakne kī wajah se Ahūd bach niklā aur Jiljāl ke butoñ se guzar kar saīrā pahuñch gayā jahāñ wuh mahfūz thā.

²⁷ Wahāñ Ifrāīm ke pahārī ilāqe meñ us ne narsingā phūñk diyā tāki Isrāīlī laṛne ke lie jamā ho jāeñ. Wuh ikaṭṭhe hue aur us kī rāhnumā meñ Wādī-e-Yardan meñ utar gae.

²⁸ Ahūd bolā, “Mere pīchhe ho leñ, kyoñki Allāh ne āp ke dushman Moāb ko āp ke hawāle kar diyā hai.” Chunāñche wuh us ke pīchhe pīchhe wādī meñ utar gae. Pahle unhoñ ne Dariyā-e-Yardan ke kam-gahre maqāmoñ par qabzā karke kisī ko dariyā pār karne na diyā.

²⁹ Us waqt unhoñ ne Moāb ke 10,000 tāqatwar aur jang karne ke qābil ādmiyoñ ko mār ḡālā. Ek bhī na bachā.

³⁰ Us din Isrāīl ne Moāb ko zer kar diyā, aur 80 sāl tak mulk meñ amn-o-amān qāym rahā.

Shamjar Qāzī

³¹ Ahūd ke daur ke bād Isrāīl kā ek aur najātdahindā ubhar āyā, Shamjar bin Anāt. Us ne bail ke āñkus se 600 Filistiyoñ ko mār ḡālā.

4

Daborā Nabiya aur Lashkar kā Sardār Baraq

¹ Jab Ahūd faut huā to Isrāīlī dubārā aisi harkateñ karne lage jo Rab ke nazdīk burī thīn.

²⁻³ Is lie Rab ne unheñ Kanān ke bādshāh Yābīn ke hawāle kar diyā. Yābīn kā dārul-hukūmat Hasūr thā, aur us ke pās 900 lohe ke rath the. Us ke lashkar kā sardār Sīsarā thā jo Harūsathagoim meñ rahtā thā. Yābīn ne 20 sāl Isrāīliyoñ par bahut zulm kiyā, is lie unhoñ ne madad ke lie Rab ko pukārā.

⁴ Un dinoñ meñ Daborā Nabiya Isrāīl kī qāzī thī. Us kā shauhar Lafīdot thā,

⁵ aur wuh ‘Daborā ke Khajūr’ ke pās rahtī thī jo Ifrāīm ke pahārī ilāqe meñ Rāmā aur Baitel ke darmiyān thā. Is daraḡht ke sāye meñ wuh Isrāīliyoñ ke muāmalāt ke faisle kiyā kartī thī.

⁶ Ek din Daborā ne Baraq bin Abīnūsam ko bulāyā. Baraq Naftālī ke qabāyli ilāqe ke shahr Qādis meñ rahtā thā. Daborā ne Baraq se kahā, “Rab Isrāīl kā Khudā āp ko hukm detā hai, ‘Naftālī aur Zabūlūn ke qabīloñ meñ se 10,000 mardoñ ko jamā karke un ke sāth Tabūr Pahār par chaḡh jā!”

⁷ Maiñ Yābīn ke lashkar ke sardār Sīsarā ko us ke rathoñ aur fauj samet tere qarīb kī Qaison Nadī ke pās khīnch lāūngā. Wahāñ maiñ use tere hāth meñ kar dūngā.’ ”

⁸ Baraq ne jawāb diyā, “Maiñ sirf is sūrat meñ jāūngā kī āp bhī sāth jāeñ. Āp ke baḡhair maiñ nahīñ jāūngā.”

⁹ Daborā ne kahā, “Ṭhīk hai, maiñ zarūr āp ke sāth jāūngī. Lekin is sūrat meñ āp ko Sīsarā par

ghālib āne kī izzat hāsīl nahīn hogī balki ek aurat ko. Kyoñki Rab Sīsarā ko ek aurat ke hawāle kar degā.”

Chunāñche Daborā Baraq ke sāth Qādis gaī.

10 Wahān Baraq ne Zabūlūn aur Naftālī ke qabīloñ ko apne pās bulā liyā. 10,000 ādmī us kī rāhnumāī meñ Tabūr Pahār par chale gae. Daborā bhī sāth gaī.

11 Un dinoñ meñ ek Qīnī banām Hibar ne apnā khaimā Qādis ke qarīb Ailon-zānanīm meñ lagāyā huā thā. Qīnī Mūsā ke sāle Hobāb kī aulād meñ se thā. Lekin Hibar dūsre Qīniyoñ se alag rahtā thā.

12 Ab Sīsarā ko ittalā dī gaī ki Baraq bin Abīnūsam fauj le kar pahār Tabūr par charḥ gayā hai.

13 Yih sun kar wuh Harūsāt-hagoim se rawānā ho kar apne 900 rathoñ aur bāqī lashkar ke sāth Qaison Nadī par pahuñch gayā.

14 Tab Daborā ne Baraq se bāt kī, “Hamlā ke lie taiyār ho jāeñ, kyoñki Rab ne āj hī Sīsarā ko āp ke qābū meñ kar diyā hai. Rab āp ke āge āge chal rahā hai.” Chunāñche Baraq apne 10,000 ādmiyoñ ke sāth Tabūr Pahār se utar āyā.

15 Jab unhoñ ne dushman par hamlā kiyā to Rab ne Kanāniyoñ ke pūre lashkar meñ rathoñ samet afrā-tafrī paidā kar dī. Sīsarā apne rath se utar kar paidal hī farār ho gayā.

16 Baraq ke ādmiyoñ ne bhāgne wāle faujiyoñ aur un ke rathoñ kā tāqqub karke un ko Harūsāt-hagoim tak mārte gae. Ek bhī na bachā.

Sīsarā kā Anjām

17 Itne meñ Sīsarā paidal chal kar Qīnī ādmī Hibar kī bīwī Yāel ke khaime ke pās bhāg āyā thā. Wajah yih thī ki Hasūr ke bādshāh Yābīn ke Hibar ke gharāne ke sāth achchhe tālluqāt the.

18 Yāel khaime se nikal kar Sīsarā se milne gai. Us ne kahā, “Āeñ mere āqā, andar āeñ aur na ḍareñ.” Chunāñche wuh andar ā kar leṭ gayā, aur Yāel ne us par kambal ḍāl diyā.

19 Sīsarā ne kahā, “Mujhe pyās lagī hai, kuchh pānī pilā do.” Yāel ne dūdh kā mashkīzā khol kar use pilā diyā aur use dubārā chhupā diyā.

20 Sīsarā ne darḱhāst kī, “Darwāze meñ kharī ho jāo! Agar koī āe aur pūchhe ki kyā khaime meñ koī hai to bolo ki nahīn, koī nahīn hai.”

21 Yih kah kar Sīsarā gahrī nīnd so gayā, kyonki wuh nihāyat thakā huā thā. Tab Yāel ne mekḱ aur hathoṛā pakaṛ liyā aur dabe pāñw Sīsarā ke pās jā kar mekḱ ko itne zor se us kī kanpaṭī meñ ṭhoñk diyā ki mekḱ zamīn meñ dhañs gai aur wuh mar gayā.

22 Kuchh der ke bād Baraq Sīsarā ke tāqqub meñ wahāñ se guzarā. Yāel khaime se nikal kar us se milne āi aur bolī, “Āeñ, main āp ko wuh ādmī dikhātī hūñ jise āp ḍhūñḍ rahe haiñ.” Baraq us ke sāth khaime meñ dākhil huā to kyā dekhā ki Sīsarā kī lāsh zamīn par paṛī hai aur mekḱ us kī kanpaṭī meñ se guzar kar zamīn meñ gaṛ gai hai.

23 Us din Allāh ne Kanānī bādshāh Yābīn ko Isrāīliyon ke sāmne zer kar diyā.

²⁴ Is ke bād un kī tāqat baḥtī gaī jabki Yābīn kamzor hotā gayā aur āḥhirkār Isrāīliyon ke hāthoñ tabāh ho gayā.

5

Daborā aur Baraq kā Gīt

¹ Fatah ke din Daborā ne Baraq bin Abīnūsam ke sāth yih gīt gāyā,

² “Allāh kī satāish ho! Kyoñki Isrāīl ke sardāroñ ne rāhnumāī kī, aur awām nikalne ke lie taiyār hue.

³ Ai bādshāho, suno! Ai hukmrāno, merī bāt par tawajjuh do! Maiñ Rab kī tamjīd meñ gīt gāūngī, Rab Isrāīl ke Ḳhudā kī madahsarāī karūngī.

⁴ Ai Rab, jab tū Saīr se nikal āyā aur Adom ke khule maidān se rawānā huā to zamīn kāñp uṭhī aur āsmān se pānī ṭapakne lagā, bādaloñ se bārish barasne lagī.

⁵ Koh-e-Sīnā ke Rab ke huzūr pahār hilne lage, Rab Isrāīl ke Ḳhudā ke sāmne wuh kapkapāne lage.

⁶ Shamjar bin Anāt aur Yāel ke dinoñ meñ safr ke pakke aur sīdhe rāste ḳhālī rahe aur musāfir un se haṭ kar bal khāte hue chhoṭe chhoṭe rāstoñ par chal kar apñī manzil tak pahunchte the.

⁷ Dehāt kī zindagī Sūnī ho gaī. Gāñw meñ rahnā mushkil thā jab tak maiñ, Daborā jo Isrāīl kī māñ hūñ khaṛī na huī.

⁸ Shahr ke darwāzoñ par jang chhiṛ gaī jab unhoñ ne nae mābūdoñ ko chun liyā. Us waqt

Isrāil ke 40,000 mardoñ ke pās ek bhī ḍhāl yā nezā na thā.

⁹ Merā dil Isrāil ke sardāroñ ke sāth hai aur un ke sāth jo ḡhushī se jang ke lie nikle. Rab kī satāish karo!

¹⁰ Ai tum jo safed gadhoñ par kapre bichhā kar un par sawār ho, Allāh kī tamjīd karo! Ai tum jo paidal chal rahe ho, Allāh kī tārīf karo!

¹¹ Suno! Jahān jānwaroñ ko pānī pilāyā jātā hai wahān log Rab ke najātbaḡhsh kāmoñ kī tārīf kar rahe haiñ, un najātbaḡhsh kāmoñ kī jo us ne Isrāil ke dehātiyoñ kī ḡhātir kie. Tab Rab ke log shahr ke darwāzoñ ke pās utar āe.

¹² Ai Daborā, uṡheñ, uṡheñ! Uṡheñ, hān uṡheñ aur ḡīt ḡāeñ! Ai Baraq, ḡhaṛe ho jāeñ! Ai Abīnūsam ke beṡe, apne qaidiyoñ ko bāndh kar le jāeñ!

¹³ Phir bache hue faujī pahārī ilāqe se utar kar qaum ke shurafā ke pās āe, Rab kī qaum sūrmāoñ ke sāth mere pās utar āī.

¹⁴ Ifrāim se jis kī jaṛeñ Amāliq meñ haiñ wuh utar āe, aur Binyamīn ke mard un ke pīchhe ho lie. Makīr se hukmrān aur Zabūlūn se sipahsālār utar āe.

¹⁵ Ishkār ke ra'īs bhī Daborā ke sāth the, aur us ke faujī Baraq ke pīchhe ho kar wādī meñ daṛṛ āe. Lekin Rūbin kā qābilā apne ilāqe meñ rah kar soch-bichār meñ uljhā rahā.

¹⁶ Tū kyoñ apne zīn ke do boroñ ke darmiyān baiṡhā rahā? Kyā galloñ ke darmiyān charwāhoñ kī bānsriyoñ kī āwāzeñ sunane ke

lie? Rūbin kā qabīlā apne ilāqe meñ rah kar soch-bichār meñ uljhā rahā.

17 Jiliyād ke gharāne Dariyā-e-Yardan ke mashriq meñ ṭhahre rahe. Aur Dān kā qabīlā, wuh kyon̄ bahrī jahāzon̄ ke pās rahā? Āshar kā qabīlā bhī sāhil par baiṭhā rahā, wuh ārām se apnī bandargāhoñ ke pās ṭhahrā rahā,

18 jabki Zabūlūn aur Naftālī apnī jān par khel kar maidān-e-jang meñ ā gae.

19 Bādshāh āe aur laṛe, Kanān ke bādshāh Majiddo Nadī par Tānak ke pās Isrāīl se laṛe. Lekin wahān se wuh chāndī kā lūṭā huā māl wāpas na lāe.

20 Āsmān se sitāroñ ne Sīsarā par hamlā kiyā, apnī āsmānī rāhoñ ko chhoṛ kar wuh us se aur us kī qaum se laṛne āe.

21 Qaison nadī unheñ uṛā le gaī, wuh nadī jo qadīm zamāne se bahtī hai. Ai merī jān, mazbūṭī se āge chaltī jā!

22 Us waqt ṭāpoñ kā baṛā shor sunāī diyā. Dushman ke zabardast ghoṛe sarpā daur rahe the.

23 Rab ke farishte ne kahā, ‘Mīroz Shahr par lānat karo, us ke bāshindoñ par ḳhūb lānat karo! Kyon̄ki wuh Rab kī madad karne na āe, wuh sūrmāoñ ke ḳhilāf Rab kī madad karne na āe.’

24 Hibar Qīnī kī bīwī mubāarak hai! Ḳhaimoñ meñ rahne wālī auratoñ meñ se wuh sab se mubāarak hai!

25 Jab Sīsarā ne pānī māngā to Yāel ne use dūdh pilāyā. Shāndār pyāle meñ lassī ḍāl kar wuh use us ke pās lāī.

26 Lekin phir us ne apne hāth se meḡh aur apne dahne hāth se mazdūron kā hathoṛā pakaṛ kar Sīsarā kā sar phoṛ diyā, us kī khopaṛī ṭukṛe ṭukṛe karke us kī kanpaṭī ko chhed diyā.

27 Us ke pānwoñ meñ wuh taṛap uṭhā. Wuh gir kar wahīñ paṛā rahā. Hāñ, wuh us ke pānwoñ meñ gir kar halāk huā.

28 Sīsarā kī māñ ne khiṛkī meñ se jhānkā aur darīche meñ se deḡhtī deḡhtī rotī rahī, ‘Us ke rath ke pahuñchne meñ itnī der kyoñ ho rahī hai? Rathoñ kī āwāz ab tak kyoñ sunāī nahīñ de rahī?’

29 Us kī dānishmand ḡhawātīn use tasallī detī haiñ aur wuh ḡhud un kī bāt dohrātī hai,

30 ‘Wuh lūṭā huā māl āpas meñ bāñṭ rahe hoñge. Har mard ke lie ek do laṛkiyāñ aur Sīsarā ke lie rangdār libās hogā. Hāñ, wuh rangdār libās aur merī gardan ko sajāne ke lie do nafīs rangdār kapṛe lā rahe hoñge.’

31 Ai Rab, tere tamām dushman Sīsarā kī tarah halāk ho jāeñ! Lekin jo tujh se pyār karte haiñ wuh pūre zor se tulū hone wāle sūraj kī mānind hoñ.”

Baraq kī is fatah ke bād Isrāīl meñ 40 sāl amn-o-amān qāym rahā.

6

Midiyānī Isrāīliyoñ ko Dabāte Haiñ

¹ Phir Isrāīlī dubārā wuh kuchh karne lage jo Rab ko burā lagā, aur us ne unheñ sāt sāl tak Midiyāniyoñ ke hawāle kar diyā.

² Midiyāniyoñ kā dabāw itnā zyādā baṛh gayā ki Isrāīliyoñ ne un se panāh lene ke lie pahārī ilāqe meñ shigāf, ghār aur gaṛhiyān banā līn.

³ Kyonki jab bhī wuh apnī fasleñ lagāte to Midiyānī, Amāliqī aur mashriq ke dīgar fauji un par hamlā karke

⁴ mulk ko gher lete aur fasloñ ko Ghazzā Shahr tak tabāh karte. Wuh khāne wālī koī bhī chīz nahīn chhoṛte the, na koī bheṛ, na koī bail, aur na koī gadhā.

⁵ Aur jab wuh apne maweshiyoñ aur khaimoñ ke sāth pahuñchte to tiḍḍiyoñ ke daloñ kī mānind the. Itne mard aur ūñṭ the ki un ko ginā nahīn jā saktā thā. Yoñ wuh mulk par chaṛh āte the tāki use tabāh karen.

⁶ Isrāīlī Midiyān ke sabab se itne pasthāl hue ki āḅhirkār madad ke lie Rab ko pukārne lage.

⁷⁻⁸ Tab us ne un meñ ek nabī bhej diyā jis ne kahā, “Rab Isrāīl kā Khudā farmātā hai ki maiñ hī tumheñ Misr kī ghulāmī se nikāl lāyā.

⁹ Maiñ ne tumheñ Misr ke hāth se aur un tamām zālīmoñ ke hāth se bachā liyā jo tumheñ dabā rahe the. Maiñ unheñ tumhāre āge āge nikāltā gayā aur un kī zamīn tumheñ de dī.

¹⁰ Us waqt maiñ ne tumheñ batāyā, ‘Maiñ Rab tumhārā Khudā hūn. Jin Amoriyoñ ke mulk meñ tum rah rahe ho un ke dewatāoñ kā khauf mat mānanā. Lekin tum ne merī na sunī.’”

Rab Jidāun ko Bulātā Hai

11 Ek din Rab kā farishtā āyā aur Ufrā meñ balūt ke ek daraḥt ke sāye meñ baiṭh gayā. Yih daraḥt Abiyazar ke ḳhāndān ke ek ādmī kā thā jis kā nām Yuās thā. Wahāñ angūr kā ras nikālne kā hauz thā, aur us meñ Yuās kā beṭā Jidāūn chhup kar gandum jhār rahā thā, hauz meñ is lie ki gandum Midiyāniyoñ se mahfūz rahe.

12 Rab kā farishtā Jidāūn par zāhir huā aur kahā, “Ai zabardast sūrme, Rab tere sāth hai!”

13 Jidāūn ne jawāb diyā, “Nahīñ janāb, agar Rab hamāre sāth ho to yih sab kuchh hamāre sāth kyoñ ho rahā hai? Us ke wuh tamām mojize āj kahāñ nazar āte haiñ jin ke bāre meñ hamāre bāpdādā hameñ batāte rahe haiñ? Kyā wuh nahīñ kahte the ki Rab hameñ Misr se nikāl lāyā? Nahīñ, janāb. Ab aisā nahīñ hai. Ab Rab ne hameñ tark karke Midiyān ke hawāle kar diyā hai.”

14 Rab ne us kī taraf muḥ kar kahā, “Apnī is tāqat meñ jā aur Isrāīl ko Midiyān ke hāth se bachā. Maiñ hī tujhe bhej rahā hūñ.”

15 Lekin Jidāūn ne etarāz kiyā, “Ai Rab, maiñ Isrāīl ko kis tarah bachāūñ? Merā ḳhāndān Manassī ke qabīle kā sab se kamzor ḳhāndān hai, aur maiñ apne bāp ke ghar meñ sab se chhoṭā hūñ.”

16 Rab ne jawāb diyā, “Maiñ tere sāth hūngā, aur tū Midiyāniyoñ ko yoñ māregā jaise ek hī ādmī ko.”

17 Tab Jidāūn ne kahā, “Agar mujh par tere karm kī nazar ho to mujhe koī ilāhī nishān dikhā tāki sābit ho jāe ki wāqai Rab hī mere sāth bāt kar rahā hai.

18 Maiñ abhī jā kar qurbānī taiyār kartā hūn aur phir wāpas ā kar use tujhe pesh karūnga. Us waqt tak rawānā na ho jānā.”

Rab ne kahā, “Ṭhīk hai, maiñ terī wāpasī kā intazār karke hī jāūngā.”

19 Jidāūn chalā gayā. Us ne bakrī kā bachchā zabah karke taiyār kiyā aur pūre 16 kilogrām maide se beḡhamīrī roṭī banāī. Phir gosht ko ṭokrī meñ rakh kar aur us kā shorbā alag bartan meñ ḡāl kar wuh sab kuchh Rab ke farishte ke pās lāyā aur use balūt ke sāye meñ pesh kiyā.

20 Rab ke farishte ne kahā, “Gosht aur beḡhamīrī roṭī ko le kar is patthar par rakh de, phir shorbā us par unḡel de.” Jidāūn ne aisā hī kiyā.

21 Rab ke farishte ke hāth meñ lāṭhī thī. Ab us ne lāṭhī ke sire se gosht aur beḡhamīrī roṭī ko chhū diyā. Achānak patthar se āg bharāk uṭhī aur ḡhurāk bhasm ho gaī. Sāth sāth Rab kā farishtā ojhal ho gayā.

22 Phir Jidāūn ko yaqīn āyā ki yih wāqā Rab kā farishtā thā, aur wuh bol uṭhā, “Hāy Rab Qādir-e-mutlaq! Mujh par afsos, kyonki maiñ ne Rab ke farishte ko rūbarū dekhā hai.”

23 Lekin Rab us se hamkalām huā aur kahā, “Terī salāmatī ho. Mat ḡar, tū nahīn maregā.”

24 Wahīn Jidāūn ne Rab ke lie qurbāngāh banāī aur us kā nām ‘Rab Salāmat Hai’ rakhā. Yih āj tak Abiyazar ke ḡhāndān ke shahr Ufrā meñ maujūd hai.

Jidāūn Bāl kī Qurbāngāh Girā Detā Hai

25 Usī rāt Rab Jidāūn se hamkalām huā, “Apne bāp ke bailoñ meñ se dūsre bail ko jo sāt sāl kā

hai chun le. Phir apne bāp kī wuh qurbāngāh girā de jis par Bāl Dewatā ko qurbāniyān chaṛhāī jāī haiñ, aur Yasīrat Dewī kā wuh khambā kāt ḍāl jo sāth khaṛā hai.

26 Is ke bād usī pahārī qile kī choṭī par Rab apne Ḳhudā ke lie sahīh qurbāngāh banā de. Yasīrat ke khambe kī kaṭī huī lakaṛī aur bail ko us par rakh kar mujhe bhasm hone wālī qurbānī pesh kar.”

27 Chunānche Jidāūn ne apne das naukaron ko sāth le kar wuh kuchh kiyā jis kā hukm Rab ne use diyā thā. Lekin wuh apne ḳhāndān aur shahr ke logoñ se ḍartā thā, is lie us ne yih kām din ke bajāe rāt ke waqt kiyā.

28 Subah ke waqt jab shahr ke log uṭhe to dekhā ki Bāl kī qurbāngāh ḍhā dī gaī hai aur Yasīrat Dewī kā sāth wālā khambā kāt diyā gayā hai. In kī jagah ek nāī qurbāngāh banāī gaī hai jis par bail ko chaṛhāyā gayā hai.

29 Unhoñ ne ek dūsre se pūchhā, “Kis ne yih kiyā?” Jab wuh is bāt kī taftīsh karne lage to kisī ne unheñ batāyā ki Jidāūn bin Yuās ne yih sab kuchh kiyā hai.

30 Tab wuh Yuās ke ghar gae aur taqāzā kiyā, “Apne beṭe ko ghar se nikāl lāeñ. Lāzim hai ki wuh mar jāe, kyoñki us ne Bāl kī qurbāngāh ko girā kar sāth wālā Yasīrat Dewī kā khambā bhī kāt ḍālā hai.”

31 Lekin Yuās ne un se jo us ke sāmne khaṛe the kahā, “Kyā āp Bāl ke difā meñ laṛnā chāhte haiñ? Jo bhī Bāl ke lie laṛegā use kal subah tak mār diyā jāegā. Agar Bāl wāqāī Ḳhudā hai

to wuh khud apne difā meñ laṛe jab koī us kī qurbāngāh ko dhā de.”

³² Chūnki Jidāun ne Bāl kī qurbāngāh girā dī thī is lie us kā nām Yarubbāl yānī ‘Bāl Us se Laṛe’ paṛ gayā.

Jidāun Allāh se Nishān Māngtā Hai

³³ Kuchh der ke bād tamām Midiyānī, Amālīqī aur dūsri mashriqī qaumeñ jamā huñ aur Dariyā-e-Yardan ko pār karke apne ḍere Maidān-e-Yazrael meñ lagāe.

³⁴ Phir Rab kā Rūh Jidāun par nāzil huā. Us ne narsingā phūnk kar Abiyazar ke khāndān ke mardoñ ko apne pīchhe ho lene ke lie bulāyā.

³⁵ Sāth sāth us ne apne qāsidoñ ko Manassī ke qabīle aur Āshar, Zabulūn aur Naftālī ke qabīloñ ke pās bhī bhej diyā. Tab wuh bhī āe aur Jidāun ke mardoñ ke sāth mil kar us ke pīchhe ho lie.

³⁶ Jidāun ne Allāh se duā kī, “Agar tū wāqāī Isrāīl ko apne wāde ke mutābiq mere zariye bachānā chāhtā hai

³⁷ to mujhe yaqīn dilā. Maiñ rāt ko tāzā katri huī un gandum gāhne ke farsh par rakh dūngā. Kal subah agar sirf un par os paṛī ho aur irdgird kā sārā farsh khushk ho to maiñ jān lūngā ki wāqāī tū apne wāde ke mutābiq Isrāīl ko mere zariye bachāegā.”

³⁸ Wuhī kuchh huā jis kī darkhāst Jidāun ne kī thī. Agle din jab wuh subah-sawere uṭhā to un os se tar thī. Jab us ne use nichoṛā to itnā pānī thā ki bartan bhar gayā.

³⁹ Phir Jidāun ne Allāh se kahā, “Mujh se ghusse na ho jānā agar maiñ tujh se ek bār phir

darḵhāst karūn. Mujhe ek āḵhirī dafā ūn ke zariye terī marzī jānchne kī ijāzat de. Is dafā ūn ḵhushk rahe aur irdgird ke sāre farsh par os paṛī ho.”

⁴⁰ Us rāt Allāh ne aisā hī kiyā. Sirf ūn ḵhushk rahī jabki irdgird ke sāre farsh par os paṛī thī.

7

Allāh Jidāun ke Sāthiyon ko Chun Letā Hai

¹ Subah-sawere Yarubbāl yānī Jidāun apne tamām logon ko sāth le kar harod chashme ke pās āyā. Wahān unhoñ ne apne ḍere lagāe. Midiyāniyon ne apnī ḵhaimāgāh un ke shimāl meñ Morih Pahār ke dāman meñ lagāī huī thī.

² Rab ne Jidāun se kahā, “Tere pās zyādā log haiñ! Maiñ is qism ke baṛe lashkar ko Midiyāniyon par fatah nahīn dūngā, warnā Isrāīlī mere sāmne dīngeñ mār kar kaheñge, ‘Ham ne apnī hī tāqat se apne āp ko bachāyā hai!’

³ Is lie lashkargāh meñ elān kar ki jo ḍar ke māre pareshān ho wuh apne ghar wāpas chalā jāe.” Jidāun ne yon kiyā to 22,000 mard wāpas chale gae jabki 10,000 Jidāun ke pās rahe.

⁴ Lekin Rab ne dubārā Jidāun se bāt kī, “Abhī tak zyādā log haiñ! In ke sāth utar kar chashme ke pās jā. Wahān maiñ unheñ jānch kar un ko muqarrar karūnga jinheñ tere sāth jānā hai.”

⁵ Chunāñche Jidāun apne ādmiyon ke sāth chashme ke pās utar āyā. Rab ne use hukm diyā, “Jo bhī apnā hāth pānī se bhar kar use kutte kī tarah chāṭ le use ek taraf kharā kar. Dūsri

taraf unheñ kharā kar jo ghuṭne ṭek kar pānī pīte haiñ.”

⁶ 300 ādmiyoñ ne apnā hāth pānī se bhar kar use chāṭ liyā jabki bāqī sab pīne ke lie jhuk gae.

⁷ Phir Rab ne Jidāūn se farmāyā, “Maiñ in 300 chāṭne wāle ādmiyoñ ke zariye Isrāīl ko bachā kar Midiyāniyoñ ko tere hawāle kar dūngā. Bāqī tamām mardoñ ko fāriḡ kar. Wuh sab apne apne ghar wāpas chale jāeñ.”

⁸ Chunāñche Jidāūn ne bāqī tamām ādmiyoñ ko fāriḡ kar diyā. Sirf muqarrarā 300 mard rah gae. Ab yih dūsroñ kī kḡurāk aur narsinge apne pās rakh kar jang ke lie taiyār hue. Us waqt Midiyānī kḡaimāgāh Isrāīliyoñ ke nīche wādī meñ thī.

Midiyāniyoñ par Jidāūn kī Fatah

⁹ Jab rāt huī to Rab Jidāūn se hamkalām huā, “Uṭh, Midiyānī kḡaimāgāh ke pās utar kar us par hamlā kar, kyoñki maiñ use tere hāth meñ de dūngā.

¹⁰ Lekin agar tū is se ḡartā hai to pahle apne naukar Fūrāh ke sāth utar kar

¹¹ wuh bāteñ sun le jo wahāñ ke log kah rahe haiñ. Tab un par hamlā karne kī jurrat baḡh jāegī.”

Jidāūn Fūrāh ke sāth kḡaimāgāh ke kināre ke pās utar āyā.

¹² Midiyānī, Amālīqī aur mashriq ke dīgar faujī ṭiḡḡiyoñ ke dal kī tarah wādī meñ phaile hue the. Un ke ūñṭ sāhil kī ret kī tarah beshumār the.

¹³ Jidāūn dabe pāñw dushman ke itne qarīb pahuñch gayā ki un kī bāteñ sun saktā thā. Ain

us waqt ek faujī dūsre ko apnā khāb sunā rahā thā, “Main ne khāb meñ dekhā ki jau kī baṛī roṭī luṛhaktī luṛhaktī hamārī khaimāgāh meñ utar āī. Yahān wuh itnī shiddat se khaima se ṭakrā gaī ki khaimā ulaṭ kar zamīnbos ho gayā.”

¹⁴ Dūsre ne jawāb diyā, “Is kā sirf yih matlab ho saktā hai ki Isrāīlī mard Jidāūn bin Yuās kī talwār ghālib āegī! Allāh use Midiyāniyon aur pūrī lashkargāh par fatah degā.”

¹⁵ Khāb aur us kī tābīr sun kar Jidāūn ne Allāh ko sijdā kiyā. Phir us ne Isrāīlī khaimāgāh meñ wāpas ā kar elān kiyā, “Uṭhen! Rab ne Midiyānī lashkargāh ko tumhāre hawāle kar diyā hai.”

¹⁶ Us ne apne 300 mardoñ ko sau sau ke tīn gurohoñ meñ taq̄sīm karke har ek ko ek narsingā aur ek gharā de diyā. Har gharē meñ mashāl thī.

¹⁷⁻¹⁸ Us ne hukm diyā, “Jo kuchh main karūnga us par ghaur karke wuhī kuchh karen. Pūrī khaimāgāh ko gher leñ aur ain wuhī kuchh karen jo main karūnga. Jab main apne sau logoñ ke sāth khaimāgāh ke kināre pahuñchūngā to ham apne narsingoñ ko bajā denge. Yih sunte hī āp bhī yihī kuchh karen aur sāth sāth nārā lagāen, ‘Rab ke lie aur Jidāūn ke lie!’”

¹⁹ Taq̄riban ādhī rāt ko Jidāūn apne sau mardoñ ke sāth Midiyānī khaimāgāh ke kināre pahuñch gayā. Thoṛī der pahle pahredār badal gae the. Achānak Isrāīliyon ne apne narsingoñ ko bajāyā aur apne gharoñ ko ṭukṛe ṭukṛe kar diyā.

²⁰ Fauran sau sau ke dūsre do gurohoñ ne bhī aisā hī kiyā. Apne dahne hāth meñ narsingā aur

bāeñ hāth meñ bharaktī mashāl pakaṛ kar wuh nārā lagāte rahe, “Rab ke lie aur Jidāūn ke lie!”

21 Lekin wuh khaimāgāh meñ dākḥil na hue balki wahīñ us ke irdgird khare rahe. Dushman meñ baṛī afrā-tafrī mach gaī. Chīkḥte-chillāte sab bhāg jāne kī koshish karne lage.

22 Jidāūn ke 300 ādmī apne narsinge bajāte rahe jabki Rab ne khaimāgāh meñ aisī gaṛbaṛ paidā kī ki log ek dūsre se laṛne lage. Ākḥirkār pūrā lashkar Bait-sittā, Sarīrāt aur Abīl-mahūlā kī sarhad tak farār huā jo Tabbāt ke qarīb hai.

23 Phir Jidāūn ne Naftālī, Āshar aur pūre Manassī ke mardoñ ko bulā liyā, aur unhoñ ne mil kar Midiyāniyoñ kā tāqqub kiyā.

24 Us ne apne qāsidoñ ke zariye Ifrāīm ke pūre pahārī ilāqe ke bāshindoñ ko bhī paighām bhej diyā, “Utar aēñ aur Midiyāniyoñ ko bhāg jāne se rokeñ! Bait-bārā tak un tamām jaghoñ par qabzā kar leñ jahān dushman Dariyā-e-Yardan ko pā-piyādā pār kar saktā hai.”

Ifrāīmī mān gae.

25 Aur unhoñ ne do Midiyānī sardāroñ ko pakaṛ kar un ke sar qalam kar die. Sardāroñ ke nām Oreb aur Zaeb the, aur jahān unheñ pakaṛā gayā un jaghoñ ke nām ‘Oreb kī Chattān’ aur ‘Zaeb kā Angūr kā Ras Nikālne Wālā Hauz’ paṛ gayā. Is ke bād wuh dubārā Midiyāniyoñ kā tāqqub karne lage. Dariyā-e-Yardan ko pār karne par un kī mulāqāt Jidāūn se huī, aur unhoñ ne donoñ sardāroñ ke sar us ke sapurd kar die.

8

Ifrāim Nārāz Ho Jātā Hai

¹ Lekin Ifrāim ke mardoñ ne shikāyat kī, “Āp ne ham se kaisā sulūk kiyā? Āp ne hameñ kyoñ nahīn bulāyā jab Midiyān se laṛne gae.” Aisī bāteñ karte karte unhoñ ne Jidāūn ke sāth saḡht bahs kī.

² Lekin Jidāūn ne jawāb diyā, “Kyā āp mujh se kahīn zyādā kāmyāb na hue? Aur jo angūr fasal jamā karne ke bād Ifrāim ke bāḡhoñ meñ rah jāte haiñ kyā wuh mere chhoṭe ḡhāndān Abiyazar kī pūrī fasal se zyādā nahīn hote?”

³ Allāh ne to Midiyān ke sardāroñ Oreb aur Zaeb ko āp ke hawāle kar diyā. Is kī nisbat mujh se kyā kāmyābī hāsīl huī hai?” Yih sun kar Ifrāim ke mardoñ kā ḡhussā ṭhanḡā ho gayā.

Sukkāt aur Fanuel Jidāūn kī Madad Nahīn Karte

⁴ Jidāūn apne 300 mardoñ samet Dariyā-e-Yardan ko pār kar chukā thā. Dushman kā tāqqub karte karte wuh thak gae the.

⁵ Is lie Jidāūn ne qarīb ke shahr Sukkāt ke bāshindoñ se guzārīsh kī, “Mere faujiyoñ ko kuchh roṭī de deñ. Wuh thak gae haiñ, kyoñki ham Midiyānī sardār Zibah aur Zalmunnā kā tāqqub kar rahe haiñ.”

⁶ Lekin Sukkāt ke buzurgoñ ne jawāb diyā, “Ham āp ke faujiyoñ ko roṭī kyoñ deñ? Kyā āp Zibah aur Zalmunnā ko pakaṛ chuke haiñ ki ham aisā karen?”

⁷ Yih sun kar Jidāūn ne kahā, “Jyoñ hī Rab in do sardāroñ Zibah aur Zalmunnā ko mere hāth

meñ kar degā main̄ tum ko registān kī kāñtedār jhāriyoñ aur ūñtkaṭāroñ se gāh kar tabāh kar dūngā.”

⁸ Wuh āge nikal kar Fanuel Shahr pahuñch gayā. Wahāñ bhī us ne roṭī māngī, lekin Fanuel ke bāshindoñ ne Sukkāṭ kā-sā jawāb diyā.

⁹ Yih sun kar us ne kahā, “Jab main̄ salāmatī se wāpas āūngā to tumhārā yih burj girā dūngā!”

Midiyāniyoñ par Pūrī Fatah

¹⁰ Ab Zibah aur Zalmunnā qarqūr pahuñch gae the. 15,000 afrād un ke sāth rah gae the, kyoñki mashriqī ittahādiyoñ ke 1,20,000 talwāroñ se lais faujī halāk ho gae the.

¹¹ Jidāun ne Midiyāniyoñ ke pīchhe chalte hue khānābadoshoñ kā wuh rāstā istemāl kiyā jo Nūbah aur Yugbahā ke mashriq meñ hai. Is tariqe se us ne un kī lashkargāh par us waqt hamlā kiyā jab wuh apne āp ko mahfūz samajh rahe the.

¹² Dushman meñ afrā-tafrī paidā huī aur Zibah aur Zalmunnā farār ho gae. Lekin Jidāun ne un kā tāqqub karte karte unheñ pakaṛ liyā.

¹³ Is ke bād Jidāun lauṭā. Wuh abhī Haris ke darrā se utar rahā thā

¹⁴ ki Sukkāṭ ke ek jawān ādmī se milā. Jidāun ne use pakaṛ kar majbūr kiyā ki wuh shahr ke rāhnumāoñ aur buzurgoñ kī fahrist likh kar de. 77 buzurg the.

¹⁵ Jidāun un ke pās gayā aur kahā, “Dekho, yih haiñ Zibah aur Zalmunnā! Tum ne inhiñ kī wajah se merā mazāq uṛā kar kahā thā ki ham āp ke thakehāre faujiyoñ ko roṭī kyoñ deñ? Kyā

āp Zibah aur Zalmunnā ko pakaṛ chuke haiñ ki ham aisā karen?”

¹⁶ Phir Jidāūn ne shahr ke buzurgoñ ko giriftār karke unheñ kāñṭedār jhāriyoñ aur ūñṭkaṭāroñ se gāh kar sabaq sikhāyā.

¹⁷ Phir wuh Fanuel gayā aur wahāñ kā burj girā kar shahr ke mardoñ ko mār ḍālā.

¹⁸ Is ke bād Jidāūn Zibah aur Zalmunnā se muḁhātib huā. Us ne pūchhā, “Un ādmiyoñ kā hulyā kaisā thā jinheñ tum ne Tabūr Pahār par qatl kiyā?”

Unhoñ ne jawāb diyā, “Wuh āp jaise the, har ek shahzādā lag rahā thā.”

¹⁹ Jidāūn bolā, “Wuh mere sage bhāi the. Rab kī hayāt kī ḡasam, agar tum un ko zindā chhoṛte to maiñ tumheñ halāk na kartā.”

²⁰ Phir wuh apne pahlauṭhe Yatar se muḁhātib ho kar bolā, “In ko mār ḍālo!” Lekin Yatar apñī talwār miyān se nikālne se jhijkā, kyoñki wuh abhī bachchā thā aur ḍartā thā.

²¹ Tab Zibah aur Zalmunnā ne kahā, “Āp hī hameñ mār deñ! Kyoñki jaisā ādmī waisī us kī tāqat!” Jidāūn ne khare ho kar unheñ talwār se mār ḍālā aur un ke ūñṭoñ kī gardanoñ par lage tāwiz utār kar apne pās rakhe.

Jidāūn ke Sabab se Isrāil Butparastī meñ Ulajh Jātā Hai

²² Isrāiliyoñ ne Jidāūn ke pās ā kar kahā, “Āp ne hameñ Midiyāniyoñ se bachā liyā hai, is lie ham par hukūmat karen, āp, āp ke bād āp kā beṭā aur us ke bād āp kā potā.”

23 Lekin Jidāūn ne jawāb diyā, “Na main āp par hukūmat karūnga, na merā beṭā. Rab hī āp par hukūmat karegā.

24 Merī sirf ek guzārish hai. Har ek mujhe apne lūṭe hue māl meñ se ek ek bālī de de.” Bāt yih thī ki dushman ke tamām afrād ne sone kī bāliyan pahān rakhī thīn, kyonki wuh Ismāīlī the.

25 Isrāīliyon ne kahā, “Ham ḡhushī se bālī deṅge.” Ek chādar zamīn par bichhā kar har ek ne ek ek bālī us par phaiñk dī.

26 Sone kī in bāliyon kā wazn taqrīban 20 kilogrām thā. Is ke alāwā Isrāīliyon ne muḡhtalif tāwīz, kān ke āweze, arḡhawānī rang ke shāhī libās aur ūñṭon kī gardanon meñ lagī qīmtī zanjīreñ bhī de dīn.

27 Is sone se Jidāūn ne ek afod * banā kar use apne ābāī shahr Ufrā meñ kharā kiyā jahān wuh us ke aur tamām ḡhāndān ke lie phandā ban gayā. Na sirf yih balki pūrā Isrāīl zinā karke but kī pūjā karne lagā.

28 Us waqt Midiyān ne aisī shikast khāī ki bād meñ Isrāīl ke lie ḡhatre kā bāis na rahā. Aur jitnī der Jidāūn zindā rahā yānī 40 sāl tak mulk meñ amn-o-amān qāym rahā.

29 Jang ke bād Jidāūn bin Yuās dubārā Ufrā meñ rahne lagā.

30 Us kī bahut-sī bīwiyān aur 70 beṭe the.

31 Us kī ek dāshtā bhī thī jo Sikam Shahr meñ rihāishpazīr thī aur jis ke ek beṭā paidā huā. Jidāūn ne beṭe kā nām Abīmalik rakhā.

* **8:27** Ām taur par Ibrānī meñ afod kā matlab imām-e-āzam kā bālāposh thā (dekhie ḡhurūj 28:4), lekin yahān is se murād butparastī kī koī chīz hai.

³² Jidāūn umrrasīdā thā jab faut huā. Use Abīazriyoñ ke shahr Ufrā meñ us ke bāp Yuās kī qabr meñ dafnāyā gayā.

³³ Jidāūn ke marte hī Isrāīlī dubārā zinā karke Bāl ke butoñ kī pūjā karne lage. Wuh Bāl-barīt ko apnā ḳhās dewatā banā kar

³⁴ Rab apne Ḳhudā ko bhūl gae jis ne unheñ irdgird ke dushmanoñ se bachā liyā thā.

³⁵ Unhoñ ne Yarubbāl yānī Jidāūn ke ḳhāndān ko bhī us ehsān ke lie koī mehrbānī na dikhāi jo Jidāūn ne un par kiyā thā.

9

Abīmalik Bādshāh Ban Jātā Hai

¹ Ek din Yarubbāl yānī Jidāūn kā beṭā Abīmalik apne māmuoñ aur māñ ke bāqī rishtedāroñ se milne ke lie Sikam gayā. Us ne un se kahā,

² “Sikam Shahr ke tamām bāshindoñ se pūchheñ, kyā āp apne āp par Jidāūn ke 70 beṭoñ kī hukūmat zyādā pasand karenge yā ek hī shaḳhs kī? Yād rahe ki main āp kā ḳhūnī rishtedār hūñ!”

³ Abīmalik ke māmuoñ ne Sikam ke tamām bāshindoñ ke sāmne yih bāteñ dohrāīñ. Sikam ke logoñ ne sochā, “Abīmalik hamārā bhāi hai” is lie wuh us ke pīchhe lag gae.

⁴ Unhoñ ne use Bāl-barīt Dewatā ke mandir se chāñdī ke 70 sikke bhī de die.

In paison se Abīmalik ne apne irdgird āwārā aur badmāsh ādmiyoñ kā guroh jamā kiyā.

⁵ Unheñ apne sāth le kar wuh Ufrā pahuñchā jahāñ bāp kā ḳhāndān rahtā thā. Wahāñ us ne apne tamām bhāiyoñ yānī Jidāūn ke 70 beṭoñ ko

ek hī patthar par qatl kar diyā. Sirf Yūtām jo Jidāūn kā sab se chhoṭā beṭā thā kahīn chhup kar bach niklā.

⁶ Is ke bād Sikam aur Bait-millo ke tamām log us balūt ke sāye meñ jamā hue jo Sikam ke satūn ke pās thā. Wahāñ unhoñ ne Abīmalik ko apnā bādshāh muqarrar kiyā.

Yūtām kī Abīmalik aur Sikam par Lānat

⁷ Jab Yūtām ko is kī ittalā milī to wuh Garizīm Pahār kī choṭī par chaṛh gayā aur ūnchī āwāz se chillāyā, “Ai Sikam ke bāshindo, suneñ merī bāt! Suneñ agar āp chāhte haiñ ki Allāh āp kī bhī sune.

⁸ Ek dīn daraḳhton ne faislā kiyā ki ham par koī bādshāh honā chāhie. Wuh use chunane aur masah karne ke lie nikle. Pahle unhoñ ne zaitūn ke daraḳht se bāt kī, ‘Hamāre bādshāh ban jāeñ!’

⁹ Lekin zaitūn ke daraḳht ne jawāb diyā, ‘Kyā main apnā tel paidā karne se bāz āūñ jis kī Allāh aur insān itnī qadar karte haiñ tāki daraḳhton par hukūmat karūñ? Hargiz nahīñ!’

¹⁰ Is ke bād daraḳhton ne anjīr ke daraḳht se bāt kī, ‘Āeñ, hamāre bādshāh ban jāeñ!’

¹¹ Lekin anjīr ke daraḳht ne jawāb diyā, ‘Kyā main apnā mīthā aur achchhā phal lāne se bāz āūñ tāki daraḳhton par hukūmat karūñ? Hargiz nahīñ!’

¹² Phir daraḳhton ne angūr kī bel se bāt kī, ‘Āeñ, hamāre bādshāh ban jāeñ!’

¹³ Lekin angūr kī bel ne jawāb diyā, ‘Kyā main apnā ras paidā karne se bāz āūñ jis se Allāh

aur insān khush ho jāte haiñ tāki darakhtōñ par hukūmat karūñ? Hargiz nahīñ!’

¹⁴ Ākhirkār darakht kāñtedār jhārī ke pās āe aur kahā, ‘Āeñ aur hamāre bādshāh ban jāeñ!’

¹⁵ Kāñtedār jhārī ne jawāb diyā, ‘Agar tum wāqaī mujhe masah karke apnā bādshāh banānā chāhte ho to āo aur mere sāye meñ panāh lo. Agar tum aisā nahīñ karnā chāhte to jhārī se āg nikal kar Lubnān ke deodār ke darakhtōñ ko bhasm kar de.’ ”

¹⁶ Yūtām ne bāt jārī rakh kar kahā, “Ab mujhe batāeñ, kyā āp ne wafādārī aur sachchāī kā izhār kiyā jab āp ne Abīmalik ko apnā bādshāh banā liyā? Kyā āp ne Jidāūn aur us ke khāndān ke sāth achchhā sulūk kiyā? Kyā āp ne us par shukrguzārī kā wuh izhār kiyā jis ke lāyq wuh thā?

¹⁷ Mere bāp ne āp kī khātir jang kī. Āp ko Midiyāniyōñ se bachāne ke lie us ne apnī jāñ khatre meñ dāl dī.

¹⁸ Lekin āj āp Jidāūn ke gharāne ke khilāf uṭh khare hue haiñ. Āp ne us ke 70 beṭōñ ko ek hī patthar par zabah karke us kī launḍī ke beṭe Abīmalik ko Sikam kā bādshāh banā liyā hai, aur yih sirf is lie ki wuh āp kā rishtedār hai.

¹⁹ Ab sunēñ! Agar āp ne Jidāūn aur us ke khāndān ke sāth wafādārī aur sachchāī kā izhār kiyā hai to phir Allāh kare ki Abīmalik āp ke lie khushī kā bāis ho aur āp us ke lie.

²⁰ Lekin agar aisā nahīñ thā to Allāh kare ki Abīmalik se āg nikal kar āp sab ko bhasm kar de jo Sikam aur Bait-millo meñ rahte haiñ! Aur āg āp se nikal kar Abīmalik ko bhī bhasm kar

de!”

²¹ Yih kah kar Yūtām ne bhāg kar bair meñ panāh lī, kyoñki wuh apne bhāī Abīmalik se ḍartā thā.

Sikam ke Bāshinde Abīmalik ke k̄hilāf Ho Jāte Haiñ

²² Abīmalik kī Isrāīl par hukūmat tīn sāl tak rahī.

²³ Lekin phir Allāh ne ek burī rūh bhej dī jis ne Abīmalik aur Sikam ke bāshindoñ meñ nā-ittafāqī paidā kar dī. Natīje meñ Sikam ke logoñ ne baġhāwat kī.

²⁴ Yoñ Allāh ne use is kī sazā dī ki us ne apne bhāiyoñ yānī Jidāūn ke 70 beṭoñ ko qatl kiyā thā. Sikam ke bāshindoñ ko bhī sazā milī, kyoñki unhoñ ne is meñ Abīmalik kī madad kī thī.

²⁵ Us waqt Sikam ke log irdgird kī choṭiyoñ par chaṛh kar Abīmalik kī tāk meñ baiṭh gae. Jo bhī wahān se guzarā use unhoñ ne lūṭ liyā. Is bāt kī k̄habar Abīmalik tak pahuñch gaī.

²⁶ Un dinoñ meñ ek ādmī apne bhāiyoñ ke sāth Sikam āyā jis kā nām Jāl bin Abad thā. Sikam ke logoñ se us kā achchhā-k̄hāsā tālluq ban gayā, aur wuh us par etibār karne lage.

²⁷ Angūr kī fasal pak gaī thī. Log shahr se nikle aur apne bāġhoñ meñ angūr toṛ kar un se ras nikālne lage. Phir unhoñ ne apne dewatā ke mandir meñ jashn manāyā. Jab wuh k̄hūb khā-pī rahe the to Abīmalik par lānat karne lage.

²⁸ Jāl bin Abad ne kahā, “Sikam kā Abīmalik ke sāth kyā wāstā ki ham us ke tābe raheñ? Wuh to sirf Yarubbāl kā beṭā hai, jis kā numāindā Zabūl hai. Us kī k̄hidmat mat karnā balki Sikam

ke bānī Hamor ke logon kī! Ham Abīmalik kī k̄hidmat kyon karen?

²⁹ Kāsh shahr kā intazām mere hāth meñ hotā! Phir main Abīmalik ko jald hī nikāl detā. Main use chailenj detā ki āo, apne faujiyon ko jamā karke ham se laṛo!”

Abīmalik Sikam se Laṛtā Hai

³⁰ Jāl bin Abad kī bāt sun kar Sikam kā sardār Zabūl baṛe ḡhusse meñ ā gayā.

³¹ Apne qāsidoñ kī mārifat us ne Abīmalik ko chupke se ittalā dī, “Jāl bin Abad apne bhāiyon ke sāth Sikam ā gayā hai jahāñ wuh pūre shahr ko āp ke k̄hilāf khaṛe ho jāne ke lie uksā rahā hai.

³² Ab aisā karen ki rāt ke waqt apne faujiyon samet idhar aen aur kheton meñ tāk meñ raheñ.

³³ Subah-sawere jab sūraj tulū hogā to shahr par hamlā karen. Jab Jāl apne ādmiyon ke sāth āp ke k̄hilāf laṛne āegā to us ke sāth wuh kuchh karen jo āp munāsib samajhte haiñ.”

³⁴ Yih sun kar Abīmalik rāt ke waqt apne faujiyon samet rawānā huā. Us ne unheñ chār gurohon meñ taqsīm kiyā jo Sikam ko gher kar tāk meñ baiṭh gae.

³⁵ Subah ke waqt jab Jāl ghar se nikal kar shahr ke darwāze meñ khaṛā huā to Abīmalik aur us ke fauji apnī chhupne kī jaghon se nikal āe.

³⁶ Unheñ dekh kar Jāl ne Zabūl se kahā, “Dekho, log paharon kī choṭiyon se utar rahe haiñ!” Zabūl ne jawāb diyā, “Nahīñ, nahīñ, jo āp ko ādmī lag rahe haiñ wuh sirf paharon ke sāye haiñ.”

³⁷ Lekin Jāl ko tasallī na huī. Wuh dubārā bol uṭhā, “Dekho, log duniyā kī nāf * se utar rahe haiñ. Aur ek aur guroh rammāloñ ke balūt se ho kar ā rahā hai.”

³⁸ Phir Zabūl ne us se kahā, “Ab terī baṛī baṛī bāteñ kahāñ rahīñ? Kyā tū ne nahīñ kahā thā, ‘Abīmalik kaun hai ki ham us ke tābe raheñ?’ Ab yih log ā gae haiñ jin kā mazāq tū ne uṛāyā. Jā, shahr se nikal kar un se laṛ!”

³⁹ Tab Jāl Sikam ke mardoñ ke sāth shahr se niklā aur Abīmalik se laṛne lagā.

⁴⁰ Lekin wuh hār gayā, aur Abīmalik ne shahr ke darwāze tak us kā tāqqub kiyā. Bhāgte bhāgte Sikam ke bahut-se afrād rāste meñ gir kar halāk ho gae.

⁴¹ Phir Abīmalik arūmā chalā gayā jabki Zabūl ne pīchhe rah kar Jāl aur us ke bhāiyōñ ko shahr se nikāl diyā.

⁴² Agle dīn Sikam ke log shahr se nikal kar maidān meñ ānā chāhte the. Jab Abīmalik ko yih khabar milī

⁴³⁻⁴⁴ to us ne apnī fauj ko tīn gurohoñ meñ taqsīm kiyā. Yih guroh dubārā Sikam ko gher kar ghāt meñ baiṭh gae. Jab log shahr se nikle to Abīmalik apne guroh ke sāth chhupne kī jagah se nikal āyā aur shahr ke darwāze meñ khaṛā ho gayā. Bāqī do guroh maidān meñ maujūd afrād par ṭuṭṭ parē aur sab ko halāk kar diyā.

⁴⁵ Phir Abīmalik ne shahr par hamlā kiyā. Log pūrā dīn laṛte rahe, lekin ākhirkār Abīmalik ne shahr par qabzā karke tamām bāshindoñ ko

* **9:37** Matlab ghālīban Koh-e-Garizīm hai.

maut ke ghāṭ utār diyā. Us ne shahr ko tabāh kiyā aur khandarāt par namak bikher kar us kī hatmī tabāhī zāhir kar dī.

⁴⁶ Jab Sikam ke burj ke rahne wāloñ ko yih ittalā milī to wuh El-barīt Dewatā ke mandir ke tahkhāne meñ chhup gae.

⁴⁷ Jab Abīmalik ko patā chalā

⁴⁸ to wuh apne faujiyoñ samet Zalmon Pahār par chaṛh gayā. Wahāñ us ne kulhārī se shākh kāṭ kar apne kandhoñ par rakh lī aur apne faujiyoñ ko hukm diyā, “Jaldī karo! Sab aisā hī karo.”

⁴⁹ Faujiyoñ ne bhī shākhēñ kāṭīñ aur phir Abīmalik ke pīchhe lag kar mandir ke pās wāpas āe. Wahāñ unhoñ ne tamām lakaṛī tahkhāne kī chhat par jamā karke use jalā diyā. Yoñ Sikam ke burj ke taqriban 1,000 mard-o-ḳhawātīn sab bhasm ho gae.

Abīmalik kī Maut

⁵⁰ Wahāñ se Abīmalik Taibiz ke ḳhilāf baṛh gayā. Us ne shahr kā muhāsarā karke us par qabzā kar liyā.

⁵¹ Lekin shahr ke bīch meñ ek mazbūt burj thā. Tamām mard-o-ḳhawātīn us meñ farār hue aur burj ke darwāzoñ par kundī lagā kar chhat par chaṛh gae.

⁵² Abīmalik laṛte laṛte burj ke darwāze ke qarīb pahuñch gayā. Wuh use jalāne kī koshish karne lagā

⁵³ to ek aurat ne chakkī kā ūpar kā pāṭ us ke sar par phaiñk diyā, aur us kī khopaṛī phaṭ gāi.

⁵⁴ Jaldī se Abīmalik ne apne silāhbardār ko bulāyā. Us ne kahā, “Apnī talwār khīñch kar

mujhe mār do! Warnā log kaheᅅge ki ek aurat ne mujhe mār ᅇālā.” Chunānche naujawān ne apnī talwār us ke badan meᅅ se guzār dī aur wuh mar gayā.

⁵⁵ Jab faujiyoᅅn ne dekhā ki Abīmālik mar gayā hai to wuh apne apne ghar chale gae.

⁵⁶ Yoᅅn Allāh ne Abīmālik ko us badī kā badlā diyā jo us ne apne 70 bhāiyoᅅn ko qatl karke apne bāp ke ᅇhilāf kī thī.

⁵⁷ Aur Allāh ne Sikam ke bāshindoᅅn ko bhī un kī sharīr harkatoᅅn kī munāsib sazā dī. Yūtām bin Yarubbāl kī lānat pūrī huī.

10

Tolā aur Yāir

¹ Abīmālik kī maut ke bād Tolā bin Fuwwā bin Dodo Isrāil ko bachāne ke lie uᅇhā. Wuh Ishkār ke qabile se thā aur Ifrāim ke pahārī ilāqe ke shahr Samīr meᅅ rihāishpazīr thā.

² Tolā 23 sāl Isrāil kā qāzī rahā. Phir wuh faut huā aur Samīr meᅅ dafnāyā gayā.

³ Us ke bād Jiliyād kā rahne wālā Yāir qāzī ban gayā. Us ne 22 sāl Isrāil kī rāhnumāi kī.

⁴ Yāir ke 30 beᅇe the. Har beᅇe kā ek ek gadhā aur Jiliyād meᅅ ek ek ābādī thī. Āj tak in kā nām ‘Hawwot-yāir’ yānī Yāir kī Bastiyān hai.

⁵ Jab Yāir intaqāl kar gayā to use Qāmon meᅅ dafnāyā gayā.

Isrāil Dubārā Rab se Dūr Ho Jātā Hai

⁶ Yāir kī maut ke bād Isrāilī dubārā aisi harkateᅅn karne lage jo Rab ko burī lagīᅅ. Wuh kāi dewatāoᅅn ke pīchhe lag gae jin meᅅ Bāl Dewatā, Astārāt Dewī aur Shām, Saidā, Moāb,

Ammoniyon aur Filistiyon ke dewatā shāmil the. Yon wuh Rab kī parastish aur ḡhidmat karne se bāz āe.

⁷ Tab us kā ḡhazab un par nāzil huā, aur us ne unheñ Filistiyon aur Ammoniyon ke hawāle kar diyā.

⁸ Usī sāl ke daurān in qaumon ne Jiliyād meñ Isrāīliyon ke us ilāḡe par qabzā kiyā jis meñ purāne zamāne meñ Amorī ābād the aur jo Dariyā-e-Yardan ke mashriḡ meñ thā. Filistī aur Ammonī 18 sāl tak Isrāīliyon ko kuchalte aur dabāte rahe.

⁹ Na sirf yih balki Ammoniyon ne Dariyā-e-Yardan ko pār karke Yahūdāh, Binyamīn aur Ifrāīm ke qabilon par bhī hamlā kiyā.

Jab Isrāīlī baḡī musībat meñ the

¹⁰ to āḡhirkār unhoñ ne madad ke lie Rab ko pukārā aur iḡrār kiyā, “Ham ne terā gunāh kiyā hai. Apne Ḳhudā ko tark karke ham ne Bāl ke buton kī pūjā kī hai.”

¹¹ Rab ne jawāb meñ kahā, “Jab Misrī, Amorī, Ammonī, Filistī,

¹² Saidānī, Amālīqī aur Māonī tum par zulm karte the aur tum madad ke lie mujhe pukārne lage to kyā main ne tumheñ na bachāyā?

¹³ Is ke bāwujūd tum bār bār mujhe tark karke dīgar mābūdon kī pūjā karte rahe ho. Is lie ab se main tumhārī madad nahīn karūnga.

¹⁴ Jāo, un dewatāon ke sāmne chīḡhte-chillāte raho jinheñ tum ne chun liyā hai! Wuhī tumheñ musībat se nikāleñ.”

¹⁵ Lekin Isrāīliyon ne Rab se fariyād kī, “Ham se ḡhaltī huī hai. Jo kuchh bhī tū munāsib

samajhtā hai wuh hamāre sāth kar. Lekin tū hī hamēñ āj bachā.”

¹⁶ Wuh ajnabī mābūdoñ ko apne bīch meñ se nikāl kar Rab kī dubārā k̄hidmat karne lage. Tab wuh Isrāīl kā dukh bardāsht na kar sakā.

Iftāh Qāzī Ban Jātā Hai

¹⁷ Un dinon meñ Ammonī apne faujiyon ko jamā karke Jiliyād meñ k̄haimāzan hue. Jawāb meñ Isrāīlī bhī jamā hue aur Misfāh meñ apne k̄haime lagāe.

¹⁸ Jiliyād ke rāhnumāon ne elān kiyā, “Hameñ aise ādmī kī zarūrat hai jo hamāre āge chal kar Ammoniyon par hamlā kare. Jo koī aisā kare wuh Jiliyād ke tamām bāshindoñ kā sardār banegā.”

11

¹ Us waqt Jiliyād meñ ek zabardast sūrmā banām Iftāh thā. Bāp kā nām Jiliyād thā jabki māñ kasbī thī.

² Lekin bāp kī bīwī ke beṭe bhī the. Jab bālīgh hue to unhoñ ne Iftāh se kaḥā, “Ham mīrās tere sāth nahīñ bāñṭeñge, kyonki tū hamārā sagā bhāī nahīñ hai.” Unhoñ ne use bhagā diyā,

³ aur wuh wahāñ se hijrat karke Mulk-e-Tob meñ jā basā. Wahāñ kuchh āwārā log us ke pīchhe ho lie jo us ke sāth idhar-udhar ghūmte-phirte rahe.

⁴ Jab kuchh der ke bād Ammonī fauj Isrāīl se larne āī

⁵ to Jiliyād ke buzurg Iftāh ko wāpas lāne ke lie Mulk-e-Tob meñ āe.

⁶ Unhoñ ne guzārish kī, “Āeñ, Ammoniyon se laṛne meñ hamārī rāhnumāi karen.”

⁷ Lekin Iftāh ne etarāz kiyā, “Āp is waqt mere pās kyoñ āe haiñ jab musībat meñ haiñ? Āp hī ne mujh se nafrat karke mujhe bāp ke ghar se nikāl diyā thā.”

⁸ Buzurgoñ ne jawāb diyā, “Ham is lie āp ke pās wāpas āe haiñ ki āp Ammoniyon ke sāth jang meñ hamārī madad karen. Agar āp aisā karen to ham āp ko pūre Jiliyād kā hukmrān banā leñge.”

⁹ Iftāh ne pūchhā, “Agar main āp ke sāth Ammoniyon ke khilāf laṛūñ aur Rab mujhe un par fatah de to kyā āp wāqai mujhe apnā hukmrān banā leñge?”

¹⁰ Unhoñ ne jawāb diyā, “Rab hamārā gawāh hai! Wuhī hameñ sazā de agar ham apnā wādā pūrā na karen.”

¹¹ Yih sun kar Iftāh Jiliyād ke buzurgoñ ke sāth Misfāh gayā. Wahān logoñ ne use apnā sardār aur fauj kā kamāñdar banā liyā. Misfāh meñ us ne Rab ke huzūr wuh tamām bāteñ dohrāñ jin kā faisla us ne buzurgoñ ke sāth kiyā thā.

Jang se Gurez Karne kī Koshish

¹² Phir Iftāh ne Ammonī bādshāh ke pās apne qāsidoñ ko bhej kar pūchhā, “Hamārā āp se kyā wāstā ki āp ham se laṛne āe haiñ?”

¹³ Bādshāh ne jawāb diyā, “Jab Isrāīlī Misr se nikle to unhoñ ne Arnon, Yabboq aur Yardan ke dariyāon ke darmiyān kā ilāqā mujh se chhīn liyā. Ab use jhagaṛā kie baḡhair mujhe wāpas kar do.”

14 Phir Iftāh ne apne qāsidoñ ko dubārā Ammonī bādshāh ke pās bhej kar

15 kahā, “Isrāīl ne na to Moābiyoñ se aur na Ammoniyōñ se zamīn chhīnī.

16 Haqīqat yih hai ki jab hamārī qaum Misr se niklī to wuh registān meñ se guzar kar Bahr-e-Qulzum aur wahāñ se ho kar Qādis pahuñch gā.

17 Qādis se unhoñ ne Adom ke bādshāh ke pās qāsīd bhej kar guzārish kī, ‘Hameñ apne mulk meñ se guzarne deñ.’ Lekin us ne inkār kiyā. Phir Isrāīliyoñ ne Moāb ke bādshāh se darḡhāst kī, lekin us ne bhī apne mulk meñ se guzarne kī ijāzat na dī. Is par hamārī qaum kuchh der ke lie Qādis meñ rahī.

18 Āḡhirkār wuh registān meñ wāpas jā kar Adom aur Moāb ke junūb meñ chalte chalte Moāb ke mashriqī kināre par pahuñchī, wahāñ jahāñ Dariyā-e-Arnon us kī sarhad hai. Lekin wuh Moāb ke ilāqe meñ dāḡhil na hue balki dariyā ke mashriq meñ ḡhaimāzan hue.

19 Wahāñ se Isrāīliyoñ ne Hasbon ke rahne wāle Amorī bādshāh Sīhon ko paighām bhī-jwāyā, ‘Hameñ apne mulk meñ se guzarne deñ tāki ham apne mulk meñ dāḡhil ho sakeñ.’

20 Lekin Sīhon ko shak huā. Use yaqīn nahīñ thā ki wuh mulk meñ se guzar kar āge barheñge. Us ne na sirf inkār kiyā balki apne faujiyoñ ko jamā karke Yahaz Shahr meñ ḡhaimāzan huā aur Isrāīliyoñ ke sāth laḡne lagā.

21 Lekin Rab Isrāīl ke Ḳhudā ne Sīhon aur us ke tamām faujiyoñ ko Isrāīl ke hawāle kar diyā. Unhoñ ne unheñ shikast de kar Amoriyoñ ke

pūre mulk par qabzā kar liyā.

²² Yih tamām ilāqā junūb meñ Dariyā-e-Arnon se le kar shimāl meñ Dariyā-e-Yabboq tak aur mashriq ke registān se le kar maġhrib meñ Dariyā-e-Yardan tak hamāre qabze meñ ā gayā.

²³ Dekheñ, Rab Isrāīl ke Khudā ne apnī qaum ke āge āge Amoriyoñ ko nikāl diyā hai. To phir āp kā is mulk par qabzā karne kā kyā haq hai?

²⁴ Āp bhī samajhte haiñ ki jise āp ke dewatā Kamos ne āp ke āge se nikāl diyā hai us ke mulk par qabzā karne kā āp kā haq hai. Isī tarah jise Rab hamāre Khudā ne hamāre āge āge nikāl diyā hai us ke mulk par qabzā karne kā haq hamārā hai.

²⁵ Kyā āp apne āp ko Moābī bādshāh Balaq bin Safor se behtar samajhte haiñ? Us ne to Isrāīl se larne balki jhagaṛne tak kī himmat na kī.

²⁶ Ab Isrāīlī 300 sāl se Hasbon aur Aroīr ke shahroñ meñ un ke gird-o-nawāh kī ābādiyoñ samet ābād haiñ aur isī tarah Dariyā-e-Arnon ke kināre par ke shahroñ meñ. Āp ne is daurān in jaghoñ par qabzā kyoñ na kiyā?

²⁷ Chunānche maiñ ne āp se ġhalat sulūk nahīn kiyā balki āp hī mere sāth ġhalat sulūk kar rahe haiñ. Kyoñki mujh se jang chheṛnā ġhalat hai. Rab jo munsif hai wuhī āj Isrāīl aur Ammon ke jhagaṛe kā faisla kare!”

²⁸ Lekin Ammonī bādshāh ne Iftāh ke paighām par dhyān na diyā.

Iftāh kī Fatah

²⁹ Phir Rab kā Rūh Iftāh par nāzil huā, aur wuh Jiliyād aur Manassī meñ se guzar gayā, phir

Jiliyād ke Misfāh ke pās wāpas āyā. Wahān se wuh apnī fauj le kar Ammoniyon se laṛne niklā.

³⁰ Pahle us ne Rab ke sāmne qasam khāi, “Agar tū mujhe Ammoniyon par fatah de

³¹ aur main sahīh-salāmat lauṭūn to jo kuchh bhī pahle mere ghar ke darwāze se nikal kar mujh se mile wuh tere lie maḥsūs kiyā jāegā. Main use bhasm hone wālī qurbānī ke taur par pesh karūngā.”

³² Phir Iftāh Ammoniyon se laṛne gayā, aur Rab ne use un par fatah dī.

³³ Iftāh ne Aroīr meñ dushman ko shikast dī aur isī tarah Minnīt aur Abīl-karāmīm tak mazīd bīs shahron par qabzā kar liyā. Yon Isrāil ne Ammon ko zer kar diyā.

Iftāh kī Wāpasī

³⁴ Is ke bād Iftāh Misfāh wāpas chalā gayā. Wuh abhī ghar ke qarīb thā ki us kī iklautī beṭī daf bajātī aur nāchtī huī ghar se nikal āī. Iftāh kā koī aur beṭā yā beṭī nahīn thī.

³⁵ Apnī beṭī ko dekh kar wuh ranj ke māre apne kapre phār kar chīkh uṭhā, “Hāy merī beṭī! Tū ne mujhe ḳhāk meñ dabā kar tabāh kar diyā hai, kyonki main ne Rab ke sāmne aisī qasam khāi hai jo badlī nahīn jā saktī.”

³⁶ Beṭī ne kahā, “Abbū, āp ne qasam khā kar Rab se wādā kiyā hai, is lie lāzim hai ki mere sāth wuh kuchh karen jis kī qasam āp ne khāi hai. Aḳhir usī ne āp ko dushman se badlā lene kī kāmyābī baḳsh dī hai.

³⁷ Lekin merī ek guzārish hai. Mujhe do māt kī muhlat den tāki main apnī saheliyon ke sāth

pahāroñ meñ jā kar apnī ḡhairshādīshudā hālat par mātām karūñ.”

³⁸ Iftāh ne ijāzat dī. Phir beṭī do māh ke lie apnī saheliyoñ ke sāth pahāroñ meñ chalī gaī aur apnī ḡhairshādīshudā hālat par mātām kiyā.

³⁹ Phir wuh apne bāp ke pās wāpas āī, aur us ne apnī qasam kā wādā pūrā kiyā. Beṭī ḡhairshādīshudā thī.

Us waqt se Isrāīl meñ dastūr rāyj hai

⁴⁰ ki Isrāīl kī jawān aurateñ sālānā chār din ke lie apne ḡharoñ se nikal kar Iftāh kī beṭī kī yād meñ jashn manātī haiñ.

12

Ifrāīm kā Qabilā Iftāh par Hamlā Kartā Hai

¹ Ammoniyōñ par fatah ke bād Ifrāīm ke qabilē ke ādmī jamā hue aur Dariyā-e-Yardan ko pār karke Iftāh ke pās āe jo Safon meñ thā. Unhoñ ne shikāyat kī, “Āp kyoñ hameñ bulāe baḡhair Ammoniyōñ se larne gae. Ab ham āp ko āp ke ḡhar samet jalā deñge!”

² Iftāh ne etarāz kiyā, “Jab merī aur merī gaum kā Ammoniyōñ ke sāth saḡht jhagaṛā chhiṛ gayā to maiñ ne āp ko bulāyā, lekin āp ne mujhe un ke hāth se na bachāyā.

³ Jab maiñ ne dekhā ki āp madad nahīn kareñge to apnī jān ḡhatre meñ ḡāl kar āp ke baḡhair hī Ammoniyōñ se larne gayā. Aur Rab ne mujhe un par fatah baḡhshī. Ab mujhe batāeñ ki āp kyoñ mere pās ā kar mujh par hamlā karnā chāhte haiñ?”

⁴ Ifrāimiyōñ ne jawāb diyā, “Tum jo Jiliyād meñ rahte ho bas Ifrāim aur Manassī ke qabīlōñ se nikle hue bhagoṛe ho.” Tab Iftāh ne Jiliyād ke mardoñ ko jamā kiyā aur Ifrāimiyōñ se laṛ kar unheñ shikast dī.

⁵ Phir Jiliyādiyōñ ne Dariyā-e-Yardan ke kam-gahre maqāmoñ par qabzā kar liyā. Jab koī guzarnā chāhtā to wuh pūchhte, “Kyā āp Ifrāimī haiñ?” Agar wuh inkār kartā

⁶ to Jiliyād ke mard kahte, “To phir lafz ‘shibbolet’ * boleñ.” Agar wuh Ifrāimī hotā to is ke bajāe “sibbolet” kahtā. Phir Jiliyādī use pakaṛ kar wahīñ mār ḍalte. Us waqt kul 42,000 Ifrāimī halāk hue.

⁷ Iftāh ne chhih sāl Isrāil kī rāhnumāi kī. Jab faut huā to use Jiliyād ke kisī shahr meñ dafnāyā gayā.

Ibzān, Ailon aur Abdon

⁸ Iftāh ke bād Ibzān Isrāil kā qāzī banā. Wuh Bait-laham meñ ābād thā,

⁹ aur us ke 30 beṭe aur 30 beṭiyāñ thīñ. Us kī tamām beṭiyāñ shādīshudā thīñ aur is wajah se bāp ke ghar meñ nahīñ rahtī thīñ. Lekin use 30 beṭōñ ke lie bīwiyañ mil gāi thīñ, aur sab us ke ghar meñ rahte the. Ibzān ne sāt sāl ke daurān Isrāil kī rāhnumāi kī.

¹⁰ Phir wuh intaqāl kar gayā aur Bait-laham meñ dafnāyā gayā.

¹¹ Us ke bād Ailon qāzī banā. Wuh Zabūlūn ke qabīle se thā aur 10 sāl ke daurān Isrāil kī rāhnumāi kartā rahā.

* 12:6 Yāni nadī.

¹² Jab wuh kūch kar gayā to use Zabūlūn ke Aiyālon meñ dafn kiyā gayā.

¹³ Phir Abdon bin Hillel qāzī banā. Wuh shahr Fir'āton kā thā.

¹⁴ Us ke 40 beṭe aur 30 pote the jo 70 gadhoñ par safr kiyā karte the. Abdon ne aṭh sāl ke daurān Isrāīl kī rāhnumāī kī.

¹⁵ Phir wuh bhī jāñ bahaq ho gayā, aur use Amālīqiyon ke pahārī ilāqe ke shahr Fir'āton meñ dafnāyā gayā, jo us waqt Ifrāīm kā hissā thā.

13

Samsūn kī Paidāish kī Peshgoī

¹ Phir Isrāīlī dubārā aisī harkateñ karne lage jo Rab ko burī lagīñ. Is lie us ne unheñ Filistiyon ke hawāle kar diyā jo unheñ 40 sāl dabāte rahe.

² Us waqt ek ādmī Sur'a Shahr meñ rahtā thā jis kā nām Manohā thā. Dān ke qabile kā yih ādmī beaulād thā, kyoñki us kī bīwī bāñjh thī.

³ Ek din Rab kā farishtā Manohā kī bīwī par zāhir huā aur kahā, “Go tujh se bachche paidā nahīn ho sakte, ab tū hāmīlā hogī, aur tere beṭā paidā hogā.

⁴ Mai yā koī aur nashā-āwar chīz mat pīnā, na koī nāpāk chīz khānā.

⁵ Kyoñki jo beṭā paidā hogā wuh paidāish se hī Allāh ke lie maḥsūs hogā. Lāzim hai ki us ke bāl kabhī na kāṭe jāeñ. Yihī bachchā Isrāīl ko Filistiyon se bachāne lagegā.”

⁶ Bīwī apne shauhar Manohā ke pās gaī aur use sab kuchh batāyā, “Allāh kā ek bandā mere pās āyā. Wuh Allāh kā farishtā lag rahā thā,

yahān tak ki main̄ saḡht ghabrā gaī. Main̄ ne us se na pūchhā ki wuh kahān se hai, aur ḡhud us ne mujhe apnā nām na batāyā.

⁷ Lekin us ne mujhe batāyā, “Tū hāmīlā hogī, aur tere beṭā paidā hogā. Ab mai yā koī aur nashā-āwar chīz mat pīnā, na koī nāpāk chīz khānā. Kyoṅki beṭā paidāish se hī maut tak Allāh ke lie maḡhsūs hogā.’ ”

⁸ Yih sun kar Manohā ne Rab se duā kī, “Ai Rab, barāh-e-karm mard-e-Ḳhudā ko dubārā hamāre pās bhej tāki wuh hamēn sikhāe ki ham us beṭe ke sāth kyā karen̄ jo paidā hone wālā hai.”

⁹ Allāh ne us kī sunī aur apne farishte ko dubārā us kī bīwī ke pās bhej diyā. Us waqt wuh shauhar ke baḡhair khet meṅ thī.

¹⁰ Farishte ko dekh kar wuh jaldī se Manohā ke pās āī aur use ittalā dī, “Jo ādmī pichhle dīnoṅ meṅ mere pās āyā wuh dubārā mujh par zāhir huā hai!”

¹¹ Manohā uṭh kar apnī bīwī ke pīchhe pīchhe farishte ke pās āyā. Us ne pūchhā, “Kyā āp wuhī ādmī haiṅ jis ne pichhle dīnoṅ meṅ merī bīwī se bāt kī thī?” Farishte ne jawāb diyā, “Jī, main̄ hī thā.”

¹² Phir Manohā ne sawāl kiyā, “Jab āp kī peshgoī pūrī ho jāegī to hamēn beṭe ke tarz-e-zīndagī aur sulūk ke silsile meṅ kin kin bātoṅ kā ḡhayāl karnā hai?”

¹³ Rab ke farishte ne jawāb diyā, “Lāzim hai ki terī bīwī un tamām chīzoṅ se parhez kare jin kā zīkr main̄ ne kiyā.

¹⁴ Wuh angūr kī koī bhī paidāwār na khāe. Na wuh mai, na koī aur nashā-āwar chīz pie.

Nāpāk chīzeñ khānā bhī manā hai. Wuh merī har hidāyat par amal kare.”

15 Manohā ne Rab ke farishte se guzārish kī, “Mehrbānī karke thoṛī der hamāre pās ṭhahreñ tāki ham bakrī kā bachchā zabah karke āp ke lie khānā taiyār kar sakeñ.”

16 Ab tak Manohā ne yih bāt nahīn pahchānī thī ki mehmān asal meñ Rab kā farishtā hai. Farishte ne jawāb diyā, “Ḳhāh tū mujhe roke bhī maiñ kuchh nahīn khāūngā. Lekin agar tū kuchh karnā chāhe to bakrī kā bachchā Rab ko bhasm hone wālī qurbānī ke taur par pesh kar.”

17 Manohā ne us se pūchhā, “Āp kā kyā nām hai? Kyoñki jab āp kī yih bāteñ pūrī ho jāeñgī to ham āp kī izzat karnā chāheñge.”

18 Farishte ne sawāl kiyā, “Tū merā nām kyoñ jānanā chāhtā hai? Wuh to terī samajh se bāhar hai.”

19 Phir Manohā ne ek baṛe patthar par Rab ko bakrī kā bachchā aur ḡhallā kī nazar pesh kī. Tab Rab ne Manohā aur us kī bīwī ke deḳhte deḳhte ek hairatangez kām kiyā.

20 Jab āg ke shole āsmān kī taraf buland hue to Rab kā farishtā shole meñ se ūpar chaṛh kar ojhal ho gayā. Manohā aur us kī bīwī muñh ke bal gir gae.

21 Jab Rab kā farishtā dubārā Manohā aur us kī bīwī par zāhir na huā to Manohā ko samajh āī ki Rab kā farishtā hī thā.

22 Wuh pukār uṭhā, “Hāy, ham mar jāeñge, kyoñki ham ne Allāh ko dekhā hai!”

23 Lekin us kī bīwī ne etarāz kiyā, “Agar Rab hameñ mār ḍālnā chāhtā to wuh hamārī qurbānī

qabūl na kartā. Phir na wuh ham par yih sab kuchh zāhir kartā, na hameñ aisī bāteñ batātā.”

²⁴ Kuchh der ke bād Manohā ke hāñ beṭā paidā huā. Bīwī ne us kā nām Samsūn rakhā. Bachchā barā hotā gayā, aur Rab ne use barkat dī.

²⁵ Allāh kā Rūh pahlī bār Mahane-dān meñ jo Sur'a aur Istāl ke darmiyān hai us par nāzil huā.

14

Samsūn kī Filistī Aurat se Shādī

¹ Ek dīn Samsūn Timnat meñ Filistiyōñ ke pās ṭhahrā huā thā. Wahāñ us ne ek Filistī aurat dekhī jo use pasand āī.

² Apne ghar lauṭ kar us ne apne wālidain ko batāyā, “Mujhe Timnat kī ek Filistī aurat pasand āī hai. Us ke sāth merā rishtā bāndhne kī koshish karen.”

³ Us ke wālidain ne jawāb diyā, “Kyā āp ke rishtedāroñ aur qaum meñ koī qābil-e-qabūl aurat nahīñ hai? Āp ko nāmaḳhtūn aur bedīn Filistiyōñ ke pās jā kar un meñ se koī aurat ḍhūñḍne kī kyā zarūrat thī?” Lekin Samsūn bazid rahā, “Usī ke sāth merī shādī karēñ! Wuhī mujhe ṭhīk lagti hai.”

⁴ Us ke māñ-bāp ko mālūm nahīñ thā ki yih sab kuchh Rab kī taraf se hai jo Filistiyōñ se laṛne kā mauqā talāsh kar rahā thā. Kyoñki us waqt Filistī Isrāīl par hukūmat kar rahe the.

⁵ Chunāñche Samsūn apne māñ-bāp samet Timnat ke lie rawānā huā. Jab wuh Timnat ke angūr ke bāghoñ ke qarīb pahuñche to Samsūn apne māñ-bāp se alag ho gayā. Achānak ek jawān sherbabar dahāṛtā huā us par ṭuṭ parā.

⁶ Tab Allāh kā Rūh itne zor se Samsūn par nāzil huā ki us ne apne hāthoñ se sher ko yoñ phār ḍālā, jis tarah ām ādmī bakrī ke chhoṭe bachche ko phār ḍāltā hai. Lekin us ne apne wālidain ko is ke bāre meñ kuchh na batāyā.

⁷ Āge nikal kar wuh Timnat pahuñch gayā. Mazkūrā Filistī aurat se bāt huī aur wuh use ṭhīk lagī.

⁸ Kuchh der ke bād wuh shādī karne ke lie dubārā Timnat gae. Shahr pahuñchne se pahle Samsūn rāste se haṭ kar sherbabar kī lāsh ko deḡhne gayā. Wahāñ kyā deḡhtā hai ki shahd kī makkhiyoñ ne sher ke pinjar meñ apnā chhattā banā liyā hai.

⁹ Samsūn ne us meñ hāth ḍāl kar shahd ko nikāl liyā aur use khāte hue chalā. Jab wuh apne māñ-bāp ke pās pahuñchā to us ne unheñ bhī kuchh diyā, magar yih na batāyā ki kahāñ se mil gayā hai.

¹⁰ Timnat pahuñch kar Samsūn kā bāp dulhan ke ḡhāndān se milā jabki Samsūn ne dūlhe kī haisiyat se aisī ziyāfat kī jis tarah us zamāne meñ dastūr thā.

Filistī Samsūn ko Dhokā Dete Haiñ

¹¹ Jab dulhan ke ghar wāloñ ko patā chalā ki Samsūn Timnat pahuñch gayā hai to unhoñ ne us ke pās 30 jawān ādmī bhej die ki us ke sāth ḡhushī manāeñ.

¹² Samsūn ne un se kahā, “Maiñ āp se paheli pūchhtā hūñ. Agar āp ziyāfat ke sāt dinoñ ke daurān is kā hal batā sakeñ to maiñ āp ko katān ke 30 qīmtī kurte aur 30 shāndār sūṭ de dūngā.

13 Lekin agar āp mujhe is kā sahīh matlab na batā sakeñ to āp ko mujhe 30 qīmīti kurte aur 30 shāndār sūṭ dene paṛenge.” Unhoñ ne jawāb diyā, “Apnī pahelī sunāen.”

14 Samsūn ne kahā, “Khāne wāle meñ se khānā niklā aur zorāwar meñ se miṭhās.”

Tīn din guzar gae. Jawān pahelī kā matlab na batā sake.

15 Chauthē din unhoñ ne dulhan ke pās jā kar use dhamkī dī, “Apne shauhar ko hameñ pahelī kā matlab batāne par uksāo, warnā ham tumheñ tumhāre khāndān samet jalā denge. Kyā tum logoñ ne hameñ sirf is lie dāwat dī ki hameñ lūṭ lo?”

16 Dulhan Samsūn ke pās gāi aur ānsū bahā bahā kar kahne lagī, “Tū mujhe pyār nahīn kartā! Haqīqat meñ tū mujh se nafrat kartā hai. Tū ne merī qaum ke logoñ se pahelī pūchhī hai lekin mujhe is kā matlab nahīn batāyā.” Samsūn ne jawāb diyā, “Maiñ ne apne mān-bāp ko bhī is kā matlab nahīn batāyā to tujhe kyon batāūn?”

17 Ziyāfat ke pūre hafte ke daurān dulhan us ke sāmne rotī rahī.

Sātweñ din Samsūn dulhan kī iltijāoñ se itnā tang ā gayā ki us ne use pahelī kā hal batā diyā. Tab dulhan ne phurtī se sab kuchh Filistiyon ko sunā diyā.

18 Sūraj ke ghurūb hone se pahle pahle shahr ke mardoñ ne Samsūn ko pahelī kā matlab batāyā, “Kyā koī chīz shahd se zyādā miṭhī aur sherbabar se zyādā zorāwar hotī hai?” Samsūn ne yih sun kar kahā, “Āp ne merī jawān gāy le

kar hal chalāyā hai, warnā āp kabhī bhī pahelī kā hal na nikāl sakte.”

¹⁹ Phir Rab kā Rūh us par nāzil huā. Us ne Askqalūn Shahr meñ jā kar 30 Filistiyōñ ko mār ḍalā aur un ke libās le kar un ādmiyōñ ko de die jinhoñ ne use pahelī kā matlab batā diyā thā.

Is ke bād wuh baṛe ḡhusse meñ apne māñ-bāp ke ghar chalā gayā.

²⁰ Lekin us kī bīwī kī shādī Samsūn ke shahbāle se karāī gaī jo 30 jawān Filistiyōñ meñ se ek thā.

15

Samsūn Filistiyōñ se Badlā Letā Hai

¹ Kuchh din guzar gae. Jab gandum kī kaṭāī hone lagī to Samsūn bakrī kā bachchā apne sāth le kar apnī bīwī se milne gayā. Susar ke ghar pahuñch kar us ne bīwī ke kamre meñ jāne kī darḡhāst kī. Lekin bāp ne inkār kiyā.

² Us ne kahā, “Yih nahīñ ho saktā! Maiñ ne beṭī kī shādī āp ke shahbāle se karā dī hai. Asal meñ mujhe yaqīn ho gayā thā ki ab āp us se saḡht nafrat karte haiñ. Lekin koī bāt nahīñ. Us kī chhoṭī bahan se shādī kar leñ. Wuh zyādā ḡhūbsūrat hai.”

³ Samsūn bolā, “Is dafā maiñ Filistiyōñ se ḡhūb badlā lūngā, aur koī nahīñ kah sakegā ki maiñ haq par nahīñ hūñ.”

⁴ Wahāñ se nikal kar us ne 300 lomṛiyōñ ko pakaṛ liyā. Do do kī dumoñ ko bāndh kar us ne har joṛe kī dumoñ ke sāth mashāl lagā dī

⁵ aur phir mashāloñ ko jalā kar lomṛiyōñ ko Filistiyōñ ke anāj ke khetoñ meñ bhagā diyā.

Kheton meñ paṛe pūle us anāj samet bhasm hue jo ab tak kāṭā nahīn gayā thā. Angūr aur zaitūn ke bāgh bhī tabāh ho gae.

⁶ Filistiyon ne dariyāft kiyā ki yih kis kā kām hai. Patā chalā ki Samsūn ne yih sab kuchh kiyā hai, aur ki wajah yih hai ki Timnat meñ us ke susar ne us kī bīwī ko us se chhīn kar us ke shahbāle ko de diyā hai. Yih sun kar Filistī Timnat gae aur Samsūn ke susar ko us kī beṭī samet pakar kar jalā diyā.

⁷ Tab Samsūn ne un se kahā, “Yih tum ne kyā kiyā hai! Jab tak main ne pūrā badlā na liyā main nahīn rukūngā.”

⁸ Wuh itne zor se un par ṭuṭ parā ki beshumār Filistī halāk hue. Phir wuh us jagah se utar kar Aitām kī chaṭṭān ke ghār meñ rahne lagā.

Lahī meñ Samsūn Filistiyon se Laṛtā Hai

⁹ Jawāb meñ Filistī fauj Yahūdāh ke qabāyli ilāqe meñ dākhlil huī. Wahān wuh Lahī Shahr ke pās khaimāzan hue.

¹⁰ Yahūdāh ke bāshindoñ ne pūchhā, “Kyā wajah hai ki āp ham se laṛne āe haiñ?” Filistiyon ne jawāb diyā, “Ham Samsūn ko pakarne āe haiñ tāki us ke sāth wuh kuchh karen jo us ne hamāre sāth kiyā hai.”

¹¹ Tab Yahūdāh ke 3,000 mard Aitām Pahār ke ghār ke pās āe aur Samsūn se kahā, “Yih āp ne hamāre sāth kyā kiyā? Āp ko to patā hai ki Filistī ham par hukūmat karte haiñ.” Samsūn ne jawāb diyā, “Main ne un ke sāth sirf wuh kuchh kiyā jo unhoñ ne mere sāth kiyā thā.”

12 Yahūdāh ke mard bole, “Ham āp ko bāndh kar Filistiyon ke hawāle karne āe haiñ.” Samsūn ne kahā, “Ṭhīk hai, lekin qasam khāeñ ki āp ḳhud mujhe qatl nahīn kareñge.”

13 Unhoñ ne jawāb diyā, “Ham āp ko hargiz qatl nahīn kareñge balki āp ko sirf bāndh kar un ke hawāle kar deñge.” Chunāñche wuh use do tātā tātā rason se bāndh kar Filistiyon ke pās le gae.

14 Samsūn abhī Lahī se dūr thā ki Filistī nāre lagāte hue us kī taraf daure āe. Tab Rab kā Rūh baṛe zor se us par nāzil huā. Us ke bāzuon se bandhe hue rasse san ke jale hue dhāge jaise kamzor ho gae. Aur wuh pighal kar hāthoñ se gir gae.

15 Kahīñ se gadhe kā tātā jabṛā pakaṛ kar us ne us ke zariye hazār afrād ko mār ḍālā.

16 Us waqt us ne nārā lagāyā, “Gadhe ke jabṛe se maiñ ne un ke ḍher lagāe haiñ! Gadhe ke jabṛe se maiñ ne hazār mardoñ ko mār ḍālā hai!”

17 Is ke bād us ne gadhe kā yih jabṛā phaiñk diyā. Us jagah kā nām Rāmat-lahī yāñī Jabṛā Pahārī paṛ gayā.

18 Samsūn ko wahāñ baṛī pyās lagī. Us ne Rab ko pukār kar kahā, “Tū hī ne apne ḳhādīm ke hāth se Isrāil ko yih baṛī najāt dilāi hai. Lekin ab maiñ pyās se mar kar nāmaḳhtūn dushman ke hāth meñ ā jāūñgā.”

19 Tab Allāh ne Lahī meñ zamīn ko chhedā, aur gaṛhe se pāñī phūṭ niklā. Samsūn us kā pāñī pī kar dubārā tātādam ho gayā. Yoñ us chashme kā nām Ain-haqqore yāñī Pukārne

Wāle kā Chashmā paṛ gayā. Āj bhī wuh Lahī meñ maujūd hai.

²⁰ Filistiyon ke daur meñ Samsūn 20 sāl tak Isrāil kā qāzī rahā.

16

Samsūn Ghazzā kā Darwāzā Uṭhā Le Jātā Hai

¹ Ek din Samsūn Filistī shahr Ghazzā meñ ayā. Wahān wuh ek kasbī ko dekh kar us ke ghar meñ dākhl huā.

² Jab shahr ke bāshindoñ ko ittalā milī ki Samsūn shahr meñ hai to unhoñ ne kasbī ke ghar ko gher liyā. Sāth sāth wuh rāt ke waqt shahr ke darwāze par tāk meñ rahe. Faislā yih huā, “Rāt ke waqt ham kuchh nahīn kareñge, jab pau phategī tab use mār dāleñge.”

³ Samsūn ab tak kasbī ke ghar meñ so rahā thā. Lekin ādhī rāt ko wuh uṭh kar shahr ke darwāze ke pās gayā aur donoñ kiwāron ko kunde aur darwāze ke donoñ bāzuoñ samet ukhāṛ kar apne kandhoñ par rakh liyā. Yoñ chalte chalte wuh sab kuchh us pahāṛī kī choṭī par le gayā jo Habrūn ke muqābil hai.

Samsūn aur Dalīlā

⁴ Kuchh der ke bād Samsūn ek aurat kī muhabbat meñ giriftār ho gayā jo Wādī-e-Sūriq meñ rahtī thī. Us kā nām Dalīlā thā.

⁵ Yih sun kar Filistī sardār us ke pās āe aur kahne lage, “Samsūn ko uksāeñ ki wuh āp ko apnī baṛī tāqat kā bhed batāe. Ham jānanā chāhte haiñ ki ham kis tarah us par ghālib ā kar use yoñ bāndh sakeñ ki wuh hamāre qabze meñ

rahe. Agar āp yih mālūm kar sakeñ to ham meñ se har ek āp ko chāndī ke 1,100 sikke degā.”

⁶ Chunāñche Dalīlā ne Samsūn se sawāl kiyā, “Mujhe apnī barī tāqat kā bhed batāeñ. Kyā āp ko kisī aisī chīz se bāndhā jā saktā hai jise āp toṛ nahīn sakte?”

⁷ Samsūn ne jawāb diyā, “Agar mujhe jānwaroñ kī sāt tāzā nasoñ se bāndhā jāe to phir maiñ ām ādmī jaisā kamzor ho jāūngā.”

⁸ Filistī sardāroñ ne Dalīlā ko sāt tāzā naseñ muhaiyā kar diñ, aur us ne Samsūn ko un se bāndh liyā.

⁹ Kuchh Filistī ādmī sāth wāle kamre meñ chhup gae. Phir Dalīlā chillā uṭhī, “Samsūn, Filistī āp ko pakaṛne āe haiñ!” Yih sun kar Samsūn ne nasoñ ko yoñ toṛ diyā jis tarah ḍorī tūṭ jāti hai jab āg meñ se guzartī hai. Chunāñche us kī tāqat kā pol na khulā.

¹⁰ Dalīlā kā muñh laṭak gayā. “Āp ne jhūṭ bol kar mujhe bewuqūf banāyā hai. Ab āeñ, mehrbānī karke mujhe batāeñ ki āp ko kis tarah bāndhā jā saktā hai.”

¹¹ Samsūn ne jawāb diyā, “Agar mujhe ḡhairistemālshudā rasoñ se bāndhā jāe to phir hī maiñ ām ādmī jaisā kamzor ho jāūngā.”

¹² Dalīlā ne nae rasse le kar use un se bāndh liyā. Is martabā bhī Filistī sāth wāle kamre meñ chhup gae the. Phir Dalīlā chillā uṭhī, “Samsūn, Filistī āp ko pakaṛne āe haiñ!” Lekin is bār bhī Samsūn ne rasoñ ko yoñ toṛ liyā jis tarah ām ādmī ḍorī ko toṛ letā hai.

¹³ Dalīlā ne shikāyat kī, “Āp bār bār jhūṭ bol kar merā mazāq uṛā rahe haiñ. Ab mujhe

batāeñ ki āp ko kis tarah bāndhā jā saktā hai.” Samsūn ne jawāb diyā, “Lāzim hai ki āp merī sāt zulfoñ ko khaḍḍī ke tāne ke sāth buneñ. Phir hī ām ādmī jaisā kamzor ho jāūngā.”

14 Jab Samsūn so rahā thā to Dalīlā ne aisā hī kiyā. Us kī sāt zulfoñ ko tāne ke sāth bun kar us ne use shaṭal ke zariye khaḍḍī ke sāth lagāyā. Phir wuh chillā uṭhī, “Samsūn, Filistī āp ko pakaṛne āe haiñ!” Samsūn jāg uṭhā aur apne bāloñ ko shaṭal samet khaḍḍī se nikāl liyā.

15 Yih dekh kar Dalīlā ne muñh phulā kar malāmat kī, “Āp kis tarah dāwā kar sakte haiñ ki mujh se muhabbat rakhte haiñ? Ab āp ne tīn martabā merā mazāq uṛā kar mujhe apnī baṛī tāqat kā bhed nahīñ batāyā.”

16 Roz baroz wuh apnī bātoñ se us kī nāk meñ dam kartī rahī. Ākhirkār Samsūn itnā tang ā gayā ki us kā jinā dūbhar ho gayā.

17 Phir us ne use khul kar bāt batāī, “Maiñ paidāish hī se Allāh ke lie maḥsūs hūñ, is lie mere bāloñ ko kabhī nahīñ kāṭā gayā. Agar sar ko muñḍwāyā jāe to merī tāqat jāṭī rahegī aur maiñ har dūsre ādmī jaisā kamzor ho jāūngā.”

18 Dalīlā ne jān liyā ki ab Samsūn ne mujhe pūrī haqīqat batāī hai. Us ne Filistī sardāroñ ko ittalā dī, “Āo, kyonki is martabā us ne mujhe apne dil kī har bāt batāī hai.” Yih sun kar wuh muqarrarā chāñdī apne sāth le kar Dalīlā ke pās āe.

19 Dalīlā ne Samsūn kā sar apnī god meñ rakh kar use sulā diyā. Phir us ne ek ādmī ko bulā kar Samsūn kī sāt zulfoñ ko muñḍwāyā. Yoñ wuh use past karne lagī, aur us kī tāqat jāṭī rahī.

20 Phir wuh chillā uṭhī, “Samsūn, Filistī āp ko pakarne āe haiñ!” Samsūn jāg uṭhā aur sochā, “Maiñ pahle kī tarah ab bhī apne āp ko bachā kar bandhan ko toṛ dūngā.” Afsos, use mālūm nahīn thā ki Rab ne use chhoṛ diyā hai.

21 Filistiyon ne use pakaṛ kar us kī ānkheñ nikāl diñ. Phir wuh use Ġhazzā le gae jahān use pītal kī zanjīron se bāndhā gayā. Wahān wuh qaidkhāne kī chakkī pīsā kartā thā.

22 Lekin hote hote us ke bāl dubārā baṛhne lage.

Samsūn kā Ākhirī Intaqām

23 Ek diñ Filistī sardār baṛā jashn manāne ke lie jamā hue. Unhoñ ne apne dewatā Dajūn ko jānwaron kī bahut-sī qurbāniyān pesh karke apnī fatah kī khushī manāī. Wuh bole, “Hamāre dewatā ne hamāre dushman Samsūn ko hamāre hawāle kar diyā hai.”

24 Samsūn ko dekh kar awām ne Dajūn kī tamjīd karke kahā, “Hamāre dewatā ne hamāre dushman ko hamāre hawāle kar diyā hai! Jis ne hamāre mulk ko tabāh kiyā aur ham meñ se itne logon ko mār ḍālā wuh ab hamāre qābū meñ ā gayā hai!”

25 Is qism kī bāteñ karte karte un kī khushī kī intahā na rahī. Tab wuh chillāne lage, “Samsūn ko bulāo tāki wuh hamāre dilon ko bahlāe.”

Chunāñche use un kī tafrīh ke lie jel se lāyā gayā aur do satūnon ke darmiyān khaṛā kar diyā gayā.

26 Samsūn us laṛke se muḁhātib huā jo us kā hāth pakaṛ kar us kī rāhnumāī kar rahā thā,

“Mujhe chhat ko uṭhāne wāle satūnoñ ke pās le jāo tāki main un kā sahārā lūñ.”

²⁷ Imārat mardoñ aur auratoñ se bharī thī. Filistī sardār bhī sab āe hue the. Sirf chhat par Samsūn kā tamāshā dekhne wāle taqrīban 3,000 afrād the.

²⁸ Phir Samsūn ne duā kī, “Ai Rab Qādir-e-mutlaq, mujhe yād kar. Bas ek dafā aur mujhe pahle kī tarah quwwat atā farmā tāki main ek hī wār se Filistiyon se apnī ānkhoñ kā badlā le sakūñ.”

²⁹ Yih kah kar Samsūn ne un do markazī satūnoñ ko pakaṛ liyā jin par chhat kā pūrā wazn thā. Un ke darmiyān khare ho kar us ne pūrī tāqat se zor lagāyā

³⁰ aur duā kī, “Mujhe Filistiyon ke sāth marne de!” Achānak satūn hil gae aur chhat dharām se Filistiyon ke tamām sardāroñ aur bāqī logoñ par gir gaī. Is tarah Samsūn ne pahle kī nisbat marte waqt kahīn zyādā Filistiyon ko mār ḍalā.

³¹ Samsūn ke bhāī aur bāqī ghar wāle āe aur us kī lāsh ko uṭhā kar us ke bāp Manohā kī qabr ke pās le gae. Wahān yānī Sur'ā aur Istāl ke darmiyān unhoñ ne use dafnāyā. Samsūn 20 sāl Isrāil kā qāzī rahā.

17

Mikāh kā But

¹ Ifrāim ke pahārī ilāqe meñ ek ādmī rahtā thā jis kā nām Mikāh thā.

² Ek din us ne apnī māñ se bāt kī, “Āp ke chāñdī ke 1,100 sikke chorī ho gae the, nā? Us waqt āp ne mere sāmne hī chor par lānat bheji

thī. Ab dekheñ, wuh paise mere pās haiñ. Maiñ hī chor hūñ.” Yih sun kar māñ ne jawāb diyā, “Mere beṭe, Rab tujhe barkat de!”

³ Mīkāh ne use tamām paise wāpas kar die, aur māñ ne elān kiyā, “Ab se yih chāñdī Rab ke lie maḡhsūs ho! Maiñ āp ke lie tarāshā aur ḡhālā huā but banwā kar chāñdī āp ko wāpas kar detī hūñ.”

⁴ Chunāñche jab beṭe ne paise wāpas kar die to māñ ne us ke 200 sikke sunār ke pās le jā kar lakaṛī kā tarāshā aur ḡhālā huā but banwāyā. Mīkāh ne yih but apne ghar meñ khaṛā kiyā,

⁵ kyoñki us kā apnā maḡdis thā. Us ne mazīd but aur ek afod * bhī banwāyā aur phir ek beṭe ko apnā imām banā liyā.

⁶ Ūs zamāne meñ Isrāīl kā koī bādshāh nahīñ thā balki har koī wuhī kuchh kartā jo use durust lagtā thā.

⁷ Un dinoñ meñ Lāwī ke qabīle kā ek jawān ādmī Yahūdāh ke qabīle ke shahr Bait-laham meñ ābād thā.

⁸ Ab wuh shahr ko chhoṛ kar rihāish kī koī aur jagah talāsh karne lagā. Ifrāīm ke pahāṛī ilāqe meñ se safr karte karte wuh Mīkāh ke ghar pahuñch gayā.

⁹ Mīkāh ne pūchhā, “Āp kahāñ se āe haiñ?” Jawān ne jawāb diyā, “Maiñ Lāwī hūñ. Maiñ Yahūdāh ke shahr Bait-laham kā rahne wālā hūñ lekin rihāish kī kisī aur jagah kī talāsh meñ hūñ.”

* 17:5 Ām taur par Ibrāñī meñ afod kā matlab imām-e-āzam kā bālāposh thā (dekhie ḡhurūj 28:4), lekin yahāñ is se murād butparastī kī koī chiz hai.

¹⁰ Mikāh bolā, “Yahān mere pās apnā ghar banā kar mere bāp aur imām baneñ. Tab āp ko sāl meñ chāndī ke das sikke aur zarūrat ke mutābiq kapṛe aur ḳhurāk milegī.”

¹¹ Lāwī muttafiq huā. Wuh wahān ābād huā, aur Mikāh ne us ke sāth beṭoñ kā-sā sulūk kiyā.

¹² Us ne use imām muḳarrar karke sochā,

¹³ “Ab Rab mujh par mehrbānī karegā, kyonki Lāwī merā imām ban gayā hai.”

18

Dān kā Qabīlā Zamīn kī Talāsh Kartā Hai

¹ Un dinon meñ Isrāīl kā bādshāh nahīn thā. Aur ab tak Dān ke qabīle ko apnā koī qabāyilī ilāqā nahīn milā thā, is lie us ke log kahīn ābād hone kī talāsh meñ rahe.

² Unhoñ ne apne ḳhāndānoñ meñ se Sur'ā aur Istāl ke pānch tajrabākār faujiyoñ ko chun kar unheñ mulk kī taftīsh karne ke lie bhej diyā. Yih mard Ifrāīm ke pahārī ilāqe meñ se guzar kar Mikāh ke ghar ke pās pahuñch gae. Jab wuh wahān rāt ke lie ṭhahre hue the

³ to unhoñ ne dekhā ki jawān Lāwī Bait-laham kī bolī boltā hai. Us ke pās jā kar unhoñ ne pūchhā, “Kaun āp ko yahān lāyā hai? Āp yahān kyā karte haiñ? Aur āp kā is ghar meñ rahne kā kyā maqsad hai?”

⁴ Lāwī ne unheñ apnī kahānī sunāī, “Mikāh ne mujhe naukarī de kar apnā imām banā liyā hai.”

⁵ Phir unhoñ ne us se guzārish kī, “Allāh se dariyāft karen ki kyā hamāre safr kā maqsad pūrā ho jāegā yā nahīn?”

⁶ Lāwī ne unheñ tasallī dī, “Salāmatī se āge baṛheñ. Āp ke safr kā maqsad Rab ko qabūl hai, aur wuh āp ke sāth hai.”

⁷ Tab yih pāñch ādmī āge nikle aur safr karte karte Lais pahuñch gae. Unhoñ ne dekhā ki wahāñ ke log Saidāniyoñ kī tarah pursukūn aur befikr zindagī guzār rahe haiñ. Koī nahīn thā jo unheñ dabātā yā un par zulm kartā. Yih bhī mālūm huā ki agar un par hamlā kiyā jāe to un kā ittahādī shahr Saidā un se itnī dūr hai ki un kī madad nahīn kar sakegā, aur qarīb koī ittahādī nahīn hai jo un kā sāth de.

⁸ Wuh pāñch jāsūs Sur'ā aur Istāl wāpas chale gae. Jab wahāñ pahuñche to dūsroñ ne pūchhā, “Safr kaisā rahā?”

⁹ Jāsūsoñ ne jawāb meñ kahā, “Āeñ, ham jang ke lie nikleñ! Hamen ek behtarīn ilāqā mil gayā hai. Āp kyoñ jhijak rahe haiñ? Jaldī karen, ham nikleñ aur us mulk par qabzā kar leñ!

¹⁰ Wahāñ ke log befikr haiñ aur hamle kī tawaqqo hī nahīn karte. Aur zamīn wasī aur zarkhez hai, us meñ kisī bhī chīz kī kamī nahīn hai. Allāh āp ko wuh mulk dene kā irādā rakhtā hai.”

Dān ke Mard Mīkāh kā But Imām Samet Chhīn Lete Haiñ

¹¹ Dān ke qabīle ke 600 musallah ādmī Sur'ā aur Istāl se rawānā hue.

¹² Rāste meñ unhoñ ne apnī lashkargāh Yahūdāh ke shahr Qiriyat-yārīm ke qarīb lagāī. Is lie yih jagah āj tak Mahane-dān yānī Dān kī Khaimāgāh kahlātī hai.

13 Wahān se wuh Ifrāim ke pahārī ilāqe meñ dākḥil hue aur chalte chalte Mikāh ke ghar pahuñch gae.

14 Jin pāñch mardoñ ne Lais kī taftīsh kī thī unhoñ ne apne sāthiyon se kahā, “Kyā āp ko mālūm hai ki in gharoñ meñ ek afod, ek tarāshā aur dhālā huā but aur dīgar kaī but haiñ? Ab soch leñ ki kyā kiyā jāe.”

15 Pāñchoñ ne Mikāh ke ghar meñ dākḥil ho kar jawān Lāwī ko salām kiyā

16 jabki bāqī 600 musallah mard geṭ par khare rahe.

17 Jab Lāwī bāhar khare mardoñ ke pās gayā to in pāñchoñ ne andar ghus kar tarāshā aur dhālā huā but, afod aur bāqī but chhīn lie.

18 Yih dekh kar Lāwī chīkhne lagā, “Kyā kar rahe ho!”

19 Unhoñ ne kahā, “Chup! Koī bāt na karo balki hamāre sāth jā kar hamāre bāp aur imām bano. Hamāre sāth jāoge to pūre qabile ke imām banoge. Kyā yih ek hī khāndān kī khidmat karne se kahīn behtar nahīn hogā?”

20 Yih sun kar imām khush huā. Wuh afod, tarāshā huā but aur bāqī butoñ ko le kar musāfiroñ meñ sharīk ho gayā.

21 Phir Dān ke mard rawānā hue. Un ke bāl-bachche, maweshī aur qīmtī māl-o-matā un ke āge āge thā.

22 Jab Mikāh ko bāt kā patā chalā to wuh apne paṛosiyon ko jamā karke un ke pīchhe daurā. Itne meñ Dān ke log ghar se dūr nikal chuke the.

23 Jab wuh sāmne nazar āe to Mikāh aur us ke sāthiyon ne chīkhte-chillāte unheñ rukne ko

kahā. Dān ke mardoñ ne pīchhe dekh kar Mīkāh se kahā, “Kyā bāt hai? Apne in logoñ ko bulā kar kyoñ le āe ho?”

²⁴ Mīkāh ne jawāb diyā, “Tum logoñ ne mere butoñ ko chhīn liyā go maiñ ne unheñ khud banwāyā hai. Mere imām ko bhī sāth le gae ho. Mere pās kuchh nahīn rahā to ab tum pūchhte ho ki kyā bāt hai?”

²⁵ Dān ke afrād bole, “Khāmosh! Khabardār, hamāre kuchh log tezmizāj haiñ. Aisā na ho ki wuh ghusse meñ ā kar tum ko tumhāre khāndān samet mār dāleñ.”

²⁶ Yih kah kar unhoñ ne apnā safr jāri rakhā. Mīkāh ne jān liyā ki maiñ apne thoṛe ādmiyoñ ke sāth un kā muqābalā nahīn kar sakūngā, is lie wuh muṛ kar apne ghar wāpas chalā gayā.

²⁷ Us ke but Dān ke qabze meñ rahe, aur imām bhī un meñ ṭik gayā.

Lais par Qabzā aur Dān kī Butparastī

Phir wuh Lais ke ilāqe meñ dākhlil hue jis ke bāshinde pursukūn aur befikr zindagī guzār rahe the. Dān ke faujī un par ṭuṭ parē aur sab ko talwār se qatl karke shahr ko bhasm kar diyā.

²⁸ Kisī ne bhī un kī madad na kī, kyoñki Saidā bahut dūr thā, aur qarīb koī ittahādī nahīn thā jo un kā sāth detā. Yih shahr Bait-rahob kī Wādī meñ thā. Dān ke afrād shahr ko az sar-e-nau tāmīr karke us meñ ābād hue.

²⁹ Aur unhoñ ne us kā nām apne qabile ke bānī ke nām par Dān rakhā. (Dān Isrāīl kā beṭā thā.)

³⁰ Wahān unhoñ ne tarāshā huā but rakh kar pūjā ke intazām par Yūnatan muqarrar kiyā jo Mūsā ke beṭe Jairsom kī aulād meñ se thā.

Jab Yūnatan faut huā to us kī aulād qaum kī jilāwatanī tak Dān ke qabīle meñ yihī k̄hidmat kartī rahī.

³¹ Mikāh kā banwāyā huā but tab tak Dān meñ rahā jab tak Allāh kā ghar Sailā meñ thā.

19

Ek Lāwī kī Apnī Dāshtā ke sāth Sulah

¹ Us zamāne meñ jab Isrāīl kā koī bādshāh nahīn thā ek Lāwī ne apne ghar meñ dāshtā rakhī jo Yahūdāh ke shahr Bait-laham kī rahne wālī thī. Ādmī Ifrāīm ke pahārī ilāqe ke kisī dūr-darāz kone meñ ābād thā.

² Lekin ek din aurat mard se nārāz huī aur maike wāpas chalī gaī. Chār māh ke bād

³ Lāwī do gadhe aur apne naukar ko le kar Bait-laham ke lie rawānā huā tāki dāshtā kā ghussā ṭhandā karke use wāpas āne par āmādā kare.

Jab us kī mulāqāt dāshtā se huī to wuh use apne bāp ke ghar meñ le gaī. Use dekh kar susar itnā k̄hush huā

⁴ ki us ne use jāne na diyā. Dāmād ko tīn din wahān ṭhaharnā paṛā jis daurān susar ne us kī k̄hūb mehmān-nawāzī kī.

⁵ Chauthē din Lāwī subah-sawere uṭh kar apnī dāshtā ke sāth rawānā hone kī taiyāriyān karne lagā. Lekin susar use rok kar bolā, “Pahle thoṛā-bahut khā kar tazīdam ho jāeñ, phir chale jānā.”

⁶ Donoñ dubārā khāne-pīne ke lie baiṭh gae.

Susar ne kahā, “Barāh-e-karm ek aur rāt yahān ṭhahar kar apnā dil bahlāeñ.”

⁷ Mehmān jāne kī taiyāriyān karne to lagā, lekin susar ne use ek aur rāt ṭaharne par majbūr kiyā. Chunānche wuh hār mān kar ruk gayā.

⁸ Pānchweñ din ādmī subah-sawere uṭhā aur jāne ke lie taiyār huā. Susar ne zor diyā, “Pahle kuchh khānā khā kar tāzādam ho jāeñ. Āp dopahar ke waqt bhī jā sakte haiñ.” Chunānche donoñ khāne ke lie baiṭh gae.

⁹ Dopahar ke waqt Lāwī apnī bīwī aur naukar ke sāth jāne ke lie uṭhā. Susar etarāz karne lagā, “Ab dekheñ, din ḍhalne wālā hai. Rāt ṭahar kar apnā dil bahlāeñ. Behtar hai ki āp kal subah-sawere hī uṭh kar ghar ke lie rawānā ho jāeñ.”

¹⁰⁻¹¹ Lekin ab Lāwī kiñi bhī sūrat meñ ek aur rāt ṭaharnā nahīñ chāhtā thā. Wuh apne gadhoñ par zīn kas kar apnī bīwī aur naukar ke sāth rawānā huā.

Chalte chalte din ḍhalne lagā. Wuh Yabūs yānī Yarūshalam ke qarīb pahuñch gae the. Shahr ko dekh kar naukar ne mālik se kahā, “Āeñ, ham Yabūsiyoñ ke is shahr meñ jā kar wahān rāt guzāreñ.”

¹² Lekin Lāwī ne etarāz kiyā, “Nahīñ, yih ajnabiyoñ kā shahr hai. Hameñ aisī jagah rāt nahīñ guzārnā chāhie jo Isrāīlī nahīñ hai. Behtar hai ki ham āge jā kar Jibiyā kī taraf barheñ.

¹³ Agar ham jaldī kareñ to ho saktā hai ki Jibiyā yā us se āge Rāmā tak pahuñch sakeñ. Wahān ārām se rāt guzār sakeñge.”

¹⁴ Chunānche wuh āge nikle. Jab sūraj ḡhurūb hone lagā to wuh Binyamīn ke qabīle ke shahr Jibiyā ke qarīb pahuñch gae

15 aur rāste se haṭ kar shahr meñ dākḥil hue. Lekin koī un kī mehmān-nawāzī nahīn karnā chāhtā thā, is lie wuh shahr ke chauk meñ ruk gae.

16 Phir andhere meñ ek būrhā ādmī wahān se guzarā. Asal meñ wuh Ifrāīm ke pahārī ilāqe kā rahne wālā thā aur Jibiyā meñ ajnabī thā, kyonki bāqī bāshinde Binyamīnī the. Ab wuh khet meñ apne kām se fāriḡh ho kar shahr meñ wāpas āyā thā.

17 Musāfiroñ ko chauk meñ dekh kar us ne pūchhā, “Āp kahān se āe aur kahān jā rahe haiñ?”

18 Lāwī ne jawāb diyā, “Ham Yahūdāh ke Bait-laham se āe haiñ aur Ifrāīm ke pahārī ilāqe ke ek dūr-darāz kone tak safr kar rahe haiñ. Wahān merā ghar hai aur wahīn se maiñ rawānā ho kar Bait-laham chalā gayā thā. Is waqt maiñ Rab ke ghar jā rahā hūn. Lekin yahān Jibiyā meñ koī nahīn jo hamārī mehmān-nawāzī karne ke lie taiyār ho,

19 hālānki hamāre pās khāne kī tamām chīzeñ maujūd haiñ. Gadhoñ ke lie bhūsā aur chārā hai, aur hamāre lie bhī kāfī roṭī aur mai hai. Hamēñ kisī bhī chīz kī zarūrat nahīn hai.”

20 Būrhe ne kahā, “Phir maiñ āp ko apne ghar meñ khushāmdīd kahtā hūn. Agar āp ko koī chīz darkār ho to maiñ use muhaiyā karūṅga. Har sūrat meñ chauk meñ rāt mat guzārnā.”

21 Wuh musāfiroñ ko apne ghar le gayā aur gadhoñ ko chārā khilāyā. Mehmānoñ ne apne pānw dho kar khānā khāyā aur mai pī.

Jibiyā ke Logoñ kā Jurm

²² Wuh yon khāne kī rifāqat se lutfandoz ho rahe the kī Jibiyā ke kuchh sharīr mard ghar ko gher kar darwāze ko zor se khaṭkhaṭāne lage. Wuh chillāe, “Us ādmī ko bāhar lā jo tere ghar meñ ṭahrā huā hai tāki ham us se ziyādatī karen!”

²³ Būrhā ādmī bāhar gayā tāki unheñ samjhāe, “Nahīn, bhāiyo, aisā shaitānī amal mat karnā. Yih ajnabī merā mehmān hai. Aisī sharmnāk harkat mat karnā!

²⁴ Is se pahle main apnī kuñwārī beṭī aur mehmān kī dāshtā ko bāhar le ātā hūn. Unhīn se ziyādatī karen. Jo jī chāhe un ke sāth karen, lekin ādmī ke sāth aisī sharmnāk harkat na karen.”

²⁵ Lekin bāhar ke mardoñ ne us kī na sunī. Tab Lāwī apnī dāshtā ko pakaṛ kar bāhar le gayā aur us ke pīchhe darwāzā band kar diyā. Shahr ke ādmī pūrī rāt us kī behurmatī karte rahe. Jab pau phaṭne lagī to unhoñ ne use fāriḡh kar diyā.

²⁶ Sūraj ke tulū hone se pahle aurat us ghar ke pās wāpas āī jis meñ shauhar ṭahrā huā thā. Darwāze tak to wuh pahuñch gaī lekin phir gir kar wahīn kī wahīn paṛī rahī.

Jab din chaṛh gayā

²⁷ to Lāwī jāg uṭhā aur safr karne kī taiyāriyāñ karne lagā. Jab darwāzā kholā to kyā deḡhtā hai kī dāshtā sāmne zamīn par paṛī hai aur hāth dahlīz par rakhe haiñ.

²⁸ Wuh bolā, “Uṭho, ham chalte haiñ.” Lekin dāshtā ne jawāb na diyā. Yih dekh kar ādmī ne use gadhe par lād liyā aur apne ghar chalā gayā.

²⁹ Jab pahuñchā to us ne chhurī le kar aurat kī lāsh ko 12 ṭukroñ meñ kāṭ liyā, phir unheñ Isrāīl

kī har jagah bhej diyā.

³⁰ Jis ne bhī yih dekhā us ne ghabrā kar kahā, “Aisā jurm hamāre darmiyān kabhī nahīn huā. Jab se ham Misr se nikal kar āe haiñ aisī harkat dekhne meñ nahīn āī. Ab lāzim hai ki ham ghaur se socheñ aur ek dūsre se mashwarā karke agle qadam ke bāre meñ faislā karen.”

20

Jibiyā ko Sazā Dene kā Faislā

¹ Tamām Isrāīlī ek dil ho kar Misfāh meñ Rab ke huzūr jamā hue. Shimāl ke Dān se le kar junūb ke Bair-sabā tak sab āe. Dariyā-e-Yardan ke pār Jiliyād se bhī log āe.

² Isrāīlī qabīloñ ke sardār bhī āe. Unhoñ ne mil kar ek baṛī fauj taiyār kī, talwāroñ se lais 4,00,000 mard jamā hue.

³ Binyamīniyoñ ko is jamāt ke bāre meñ ittalā milī.

Isrāīliyoñ ne pūchhā, “Hameñ batāeñ ki yih haibatnāk jurm kis tarah sarzad huā?”

⁴ Maqtūlā ke shauhar ne unheñ apnī kahānī sunāī, “Maiñ apnī dāshtā ke sāth Jibiyā meñ ā ṭhahrā jo Binyamīniyoñ ke ilāqe meñ hai. Ham wahān rāt guzārnā chāhte the.

⁵ Yih dekh kar shahr ke mardoñ ne mere mezbān ke ghar ko gher liyā tāki mujhe qatl karen. Maiñ to bach gayā, lekin merī dāshtā se itnī ziyādatī huī ki wuh mar gāī.

⁶ Yih dekh kar maiñ ne us kī lāsh ko ṭukṛe ṭukṛe karke yih ṭukṛe Isrāīl kī mirās kī har jagah bhej die tāki har ek ko mālūm ho jāe ki hamāre mulk meñ kitnā ghinaunā jurm sarzad huā hai.

⁷ Is par āp sab yahān jamā hue haiñ. Isrāīl ke mardo, ab lāzim hai ki āp ek dūsre se mashwarā karke faislā karen ki kyā karnā chāhie.”

⁸ Tamām mard ek dil ho kar khaṛe hue. Sab kā faislā thā, “Ham meñ se koī bhī apne ghar wāpas nahīñ jāegā

⁹ jab tak Jibiyā ko munāsib sazā na dī jāe. Lāzim hai ki ham fauran shahr par hamlā karen aur is ke lie qurā ḍāl kar Rab se hidāyat leñ.

¹⁰ Ham yih faislā bhī karen ki kaun kaun hamārī fauj ke lie khāne-pīne kā band-o-bast karāegā. Is kām ke lie ham meñ se har daswān ādmī kāfi hai. Bāqī sab log sīdhe Jibiyā se larne jāeñ tāki us sharmnāk jurm kā munāsib badlā leñ jo Isrāīl meñ huā hai.”

¹¹ Yoñ tamām Isrāīlī muttahid ho kar Jibiyā se larne ke lie gae.

¹² Rāste meñ unhoñ ne Binyamīn ke har kunbe ko paighām bhijwāyā, “Āp ke darmiyān ghinaunā jurm huā hai.

¹³ Ab Jibiyā ke in sharīr ādmiyoñ ko hamāre hawāle karen tāki ham unheñ sazā-e-maut de kar Isrāīl meñ se burāi miṭā deñ.”

Lekin Binyamīnī is ke lie taiyār na hue.

¹⁴ Wuh pūre qabāylī ilāqe se ā kar Jibiyā meñ jamā hue tāki Isrāīliyoñ se larēñ.

¹⁵ Usī din unhoñ ne apnī fauj kā band-o-bast kiyā. Jibiyā ke 700 tajrabākār faujiyoñ ke alāwā talwāroñ se lais 26,000 afrād the.

¹⁶ In faujiyoñ meñ se 700 aise mard bhī the jo apne bāeñ hāth se falākhan chalāne kī itnī mahārat rakhte the ki patthar bāl jaise chhoṭe nishāne par bhī lag jātā thā.

¹⁷ Dūsri taraf Isrāīl ke 4,00,000 faujī khare hue, aur har ek ke pās talwār thī.

¹⁸ Pahle Isrāīlī Baitel chale gae. Wahān unhoñ ne Allāh se dariyāft kiyā, “Kaun-sā qabilā hamāre āge āge chale jab ham Binyamīniyoñ par hamlā karen?” Rab ne jawāb diyā, “Yahūdāh sab se āge chale.”

Binyamīn ke khilāf Jang

¹⁹ Agle din Isrāīlī rawānā hue aur Jibiyā ke qarīb pahuñch kar apnī lashkargāh lagāi.

²⁰ Phir wuh hamlā ke lie nikle aur tartīb se larne ke lie khare ho gae.

²¹ Yih dekh kar Binyamīnī shahr se nikle aur un par tūt parē. Natīje meñ 22,000 Isrāīlī shahīd ho gae.

²²⁻²³ Isrāīlī Baitel chale gae aur shām tak Rab ke huzūr rote rahe. Unhoñ ne Rab se pūchhā, “Kyā ham dubārā apne Binyamīnī bhāiyoñ se larne jāen?” Rab ne jawāb diyā, “Hān, un par hamlā karo!” Yih sun kar Isrāīliyoñ kā hauslā barh gayā aur wuh agle din wahīn khare ho gae jahān pahle din khare hue the.

²⁴ Lekin jab wuh shahr ke qarīb pahuñche

²⁵ to Binyamīnī pahle kī tarah shahr se nikal kar un par tūt parē. Us din talwār se lais 18,000 Isrāīlī shahīd ho gae.

²⁶ Phir Isrāīl kā pūrā lashkar Baitel chalā gayā. Wahān wuh shām tak Rab ke huzūr rote aur rozā rakhte rahe. Unhoñ ne Rab ko bhasm hone wālī qurbāniyāñ aur salāmatī kī qurbāniyāñ pesh karke

²⁷ us se dariyāft kiyā ki ham kyā karen. (Us waqt Allāh ke ahd kā sandūq Baitel meñ thā

28 jahān Fīnhās bin Iliyazar bin Hārūn imām thā.) Isrāīliyoñ ne pūchhā, “Kyā ham ek aur martabā apne Binyamīnī bhāiyōñ se laṛne jāeñ yā is se bāz aeñ?” Rab ne jawāb diyā, “Un par hamlā karo, kyoñki kal hī maiñ unheñ tumhāre hawāle kar dūngā.”

Binyamīn kā Satyānās

29 Is dafā kuchh Isrāīlī Jibiyā ke irdgird ghāt meñ baiṭh gae.

30 Bāqī afrād pahle do dinoñ kī-sī tartīb ke mutābiq laṛne ke lie khare ho gae.

31 Binyamīnī dubārā shahr se nikal kar un par tūṭ paṛe. Jo rāste Baitel aur Jibiyā kī taraf le jāte haiñ un par aur khule maidān meñ unhoñ ne taqriban 30 Isrāīliyoñ ko mār dālā. Yoñ laṛte laṛte wuh shahr se dūr hote gae.

32 Wuh pukāre, “Ab ham unheñ pahlī do martabā kī tarah shikast deñge!”

Lekin Isrāīliyoñ ne mansūbā bāndh liyā thā, “Ham un ke āge āge bhāgte hue unheñ shahr se dūr rāstoñ par khīnch leñge.”

33 Yoñ wuh bhāgne lage aur Binyamīnī un ke pīchhe paṛ gae. Lekin Bāl-tamr ke qarīb Isrāīlī ruk kar muṛ gae aur un kā sāmna karne lage. Ab bāqī Isrāīlī jo Jibā ke irdgird aur khule maidān meñ ghāt meñ baiṭhe the apnī chhupne kī jaghoñ se nikal āe.

34 Achānak Jibiyā ke Binyamīniyoñ ko 10,000 behtarīn faujiyoñ kā sāmna karnā paṛā, un mardoñ kā jo pūre Isrāīl se chune gae the. Binyamīnī un se khūb laṛne lage, lekin un kī

ānkhēñ abhī is bāt ke lie band thīñ ki un kā anjām qarīb ā gayā hai.

³⁵ Us din Isrāīliyoñ ne Rab kī madad se fatah pā kar talwār se lais 25,100 Binyamīnī faujiyoñ ko maut ke ghāt utār diyā.

³⁶ Tab Binyamīniyoñ ne jāñ liyā ki dushman ham par ghālib ā gae haiñ. Kyoñki Isrāīlī fauj ne apne bhāg jāne se unheñ Jibiyā se dūr khīñch liyā thā tāki shahr ke irdgird ghāt meñ baiṭhe mardoñ ko shahr par hamlā karne kā mauqā muhaiyā karen.

³⁷ Tab yih mard nikal kar shahr par tūt paṛe aur talwār se tamām bāshindoñ ko mār ḍālā,

³⁸⁻³⁹ phir mansūbe ke mutābiq āg lagā kar dhueñ kā barā bādāl paidā kiyā tāki bhāgne wāle Isrāīliyoñ ko ishārā mil jāe ki wuh muṛ kar Binyamīniyoñ kā muqābalā karen.

Us waqt tak Binyamīniyoñ ne taqrīban 30 Isrāīliyoñ ko mār ḍālā thā, aur un kā kḥayāl thā ki ham unheñ pahle kī tarah shikast de rahe haiñ.

⁴⁰ Achānak un ke pīchhe dhueñ kā bādāl āsmān kī taraf uṭhne lagā. Jab Binyamīniyoñ ne muṛ kar dekhā ki shahr ke kone kone se dhuāñ nikal rahā hai

⁴¹ to Isrāīl ke mard ruk gae aur palaṭ kar un kā sāmna karne lage.

Binyamīnī saḡht ghabrā gae. Kyoñki unhoñ ne jāñ liyā ki ham tabāh ho gae haiñ.

⁴²⁻⁴³ Tab unhoñ ne mashriq ke registān kī taraf farār hone kī koshish kī. Lekin ab wuh mard bhī un kā tāqqub karne lage jinhoñ ne ghāt

meñ baiṭh kar Jibiyā par hamlā kiyā thā. Yoñ Isrāīliyoñ ne mafrūroñ ko gher kar mār ḍālā.

⁴⁴ Us waqt Binyamīn ke 18,000 tajrabākār faujī halāk hue.

⁴⁵ Jo bach gae wuh registān kī chaṭṭān Rimmon kī taraf bhāg nikle. Lekin Isrāīliyoñ ne rāste meñ un ke 5,000 afrād ko maut ke ghāṭ utār diyā. Is ke bād unhoñ ne jid'om tak un kā tāqqub kiyā. Mazīd 2,000 Binyamīnī halāk hue.

⁴⁶ Is tarah Binyamīn ke kul 25,000 talwār se lais aur tajrabākār faujī māre gae.

⁴⁷ Sirf 600 mard bach kar Rimmon kī chaṭṭān tak pahuñch gae. Wahāñ wuh chār mahīne tak ṭike rahe.

⁴⁸ Tab Isrāīlī tāqqub karne se bāz ā kar Binyamīn ke qabāylī ilāqe meñ wāpas āe. Wahāñ unhoñ ne jagah bajagah jā kar sab kuchh maut ke ghāṭ utār diyā. Jo bhī unheñ milā wuh talwār kī zad meñ ā gayā, kḥāh insān thā yā haiwān. Sāth sāth unhoñ ne tamām shahroñ ko āg lagā dī.

21

Binyamīniyoñ ko Aurateñ Miltī Haiñ

¹ Jab Isrāīlī Misfāh meñ jamā hue the to sab ne qasam khā kar kahā thā, “Ham kabhī bhī apnī beṭiyōñ kā kisī Binyamīnī mard ke sāth rishtā nahīn bāndheñge.”

² Ab wuh Baitel chale gae aur shām tak Allāh ke huzūr baiṭhe rahe. Ro ro kar unhoñ ne duā kī,

³ “Ai Rab, Isrāīl ke Ḳhudā, hamārī qaum kā ek pūrā qabilā miṭ gayā hai! Yih musibat Isrāīl par kyoñ āī?”

⁴ Agle din wuh subah-sawere uṭhe aur qurbāngāh banā kar us par bhasm hone wālī aur salāmatī kī qurbāniyān chaṛhāīn.

⁵ Phir wuh ek dūsre se pūchhne lage, “Jab ham Misfāh meñ Rab ke huzūr jamā hue to hamārī qaum meñ se kaun kaun ijtimā meñ sharīk na huā?” Kyoñki us waqt unhoñ ne qasam khā kar elān kiyā thā, “Jis ne yahān Rab ke huzūr āne se inkār kiyā use zarūr sazā-e-maut dī jāegī.”

⁶ Ab Isrāīliyoñ ko Binyamīniyoñ par afsos huā. Unhoñ ne kahā, “Ek pūrā qabilā miṭ gayā hai.

⁷ Ab ham un thore bache-khuche ādmioñ ko bīwiyān kis tarah muhaiyā kar sakte haiñ? Ham ne to Rab ke huzūr qasam khāī hai ki apñi beṭiyoñ kā un ke sāth rishtā nahīn bāndheñge.

⁸ Lekin ho saktā hai koī ḳhāndān Misfāh ke ijtimā meñ na āyā ho. Āo, ham patā karen.

Mālūm huā ki Yabīs-jiliyād ke bāshinde nahīn āe the.

⁹ Yih bāt faujiyoñ ko ginane se patā chalī, kyoñki ginte waqt Yabīs-jiliyād kā koī bhī shaḳhs fauj meñ nahīn thā.

¹⁰ Tab unhoñ ne 12,000 faujiyoñ ko chun kar unheñ hukm diyā, “Yabīs-jiliyād par hamlā karke tamām bāshindoñ ko bāl-bachchoñ samet mār ḍālo.

¹¹ Sirf kuñwāriyoñ ko zindā rahne do.”

¹² Faujiyoñ ne Yabīs meñ 400 kuñwāriyān pāīn. Wuh unheñ Sailā le āe jahān Isrāīliyoñ kā lashkar ṭhahrā huā thā.

13 Wahān se unhoñ ne apne qāsidoñ ko Rimmon kī chaṭṭān ke pās bhej kar Binyamīniyoñ ke sāth sulah kar lī.

14 Phir Binyamīn ke 600 mard registān se wāpas āe, aur un ke sāth Yabīs-jiliyād kī kuñwāriyoñ kī shādī huī. Lekin yih sab ke lie kāfī nahīn thīn.

15 Isrāīliyoñ ko Binyamīn par afsos huā, kyoñki Rab ne Isrāīl ke qābiloñ meñ khalā ḍāl diyā thā.

16 Jamāt ke buzurgoñ ne dubārā pūchhā, “Hameñ Binyamīn ke bāqī mardoñ ke lie kahān se bīwiyān mileṅgī? Un kī tamām aurateñ to halāk ho gaī haiñ.

17 Lāzim hai ki unheñ un kā maurūsī ilāqā wāpas mil jāe. Aisā na ho ki wuh bilkul miṭ jāeñ.

18 Lekin ham apnī beṭiyoñ kī un ke sāth shādī nahīn karā sakte, kyoñki ham ne qasam khā kar elān kiyā hai, ‘Jo apnī beṭī kā rishtā Binyamīn ke kisī mard se bāndhegā us par Allāh kī lānat ho.’ ”

19 Yoñ sochte sochte unheñ ākḥirkār yih tarkīb sūjhī, “Kuchh der ke bād yahān Sailā meñ Rab kī sālānā īd manāī jāegī. Sailā Baitel ke shimāl meñ, Labūnā ke junūb meñ aur us rāste ke mashriq meñ hai jo Baitel se Sikam tak le jātā hai.

20 Ab Binyamīnī mardoñ ke lie hamārā mashwarā hai ki īd ke dinon meñ angūr ke bāghon meñ chhup kar ghāt meñ baiṭh jāeñ.

21 Jab laṛkiyān loknāch ke lie Sailā se nikleṅgī to phir bāghon se nikal kar un par jhapaṭ paṛnā. Har ādmī ek laṛkī ko pakaṛ kar use apne ghar le jāe.

²² Jab un ke bāp aur bhāi hamāre pās ā kar āp kī shikāyat karenge to ham un se kaheᅅge, ‘Binyamīniyoᅅ par tars khāeᅅ, kyoᅅki jab ham ne Yabis par fatah pāi to ham un ke lie kāfi aurateᅅ hāsil na kar sake. Āp bequsūr haiᅅ, kyoᅅki āp ne unheᅅ apnī beᅅiyoᅅ ko irādatan to nahīᅅ diyā.’ ”

²³ Binyamīniyoᅅ ne buzurgoᅅ kī is hidāyat par amal kiyā. Īd ke dīnoᅅ meᅅ jab laᅅkiyaᅅ nāch rahī thīᅅ to Binyamīniyoᅅ ne utnī pakaᅅ liᅅ ki un kī kamī pūrī ho gai. Phir wuh unheᅅ apne qabāyli ilāqe meᅅ le gae aur shahroᅅ ko dubārā tāmir karke un meᅅ basne lage.

²⁴ Bāqi Isrāīli bhī wahāᅅ se chale gae. Har ek apne qabāyli ilāqe meᅅ wāpas chalā gayā.

²⁵ Us zamāne meᅅ Isrāīl meᅅ koī bādshāh nahīᅅ thā. Har ek wuhī kuchh kartā jo use munāsib lagtā thā.

lxxx

Kitab-i Muqaddas
The Holy Bible in Urdu, Urdu Geo Version, Roman
Script

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

PDF generated using Haiola and XeLaTeX on 1 Oct 2024 from source files dated 20 Sep 2024

123ff8cb-27b3-5817-a02a-22e67145fd30